



3

TOKI ADMINISTRAZIOA

ERREENTERIAKO UDALA

Ingurumena

Animaliak babesteari eta edukitzeari buruzko Erreneriako udal ordenantza.

Udalbatzak, 2021eko apirilaren 27an egindako bilkuran, hasierako onespena eman zion animaliak babesteko eta edukitzeko Erreneriako udal ordenantzari.

Dokumentu hori jendaurrean egon da 2021eko maiatzaren 14tik ekainaren 24ra eta 2021eko uztailaren 28tik irailaren 7ra (biak barne). Jendaurreko erakustaldi horretan ez da ekarpenik edo erreklamaziorik aurkeztu.

Alkatetza ebazpen bitartez, 2021eko irailaren 24ean, erabaki zen behin betiko onartutzat hartzea animaliak babesteko eta edukitzeko Erreneriako udal ordenantza, hasierako onespenean egin zen baldintza berdinetan.

Hori horrela Toki Erregimeneko Oinarriak Arazten dituen apirilaren 2ko 7/1985 Legearen 70.2 artikuluan aurreikusitakoa betetzearren, onartutako animaliak babesteko eta edukitzeko Erreneriako udal ordenantza horren testu oso-oso argitaratzen da eta indarrean sartuko da iragarkia Gipuzkoako ALDIZKARI OFIZIALEAN argitaratu eta hurrengo egunean.

Oro har guztiek jakin dezaten eta eraginak izan ditzan argitaratzen dut. Era berean, jakinarazten da akordio honek administrazioaren bidea agortzen duela eta horren kontra administrazioarekiko auzi-errekurtsoa aurkeztu ahal izango dela Euskal Autonomia Erkidegoko Auzitegi Nagusiaren aurrean, bi hilabeteko epean, iragarki hau Gipuzkoako ALDIZKARI OFIZIALEAN argitaratu eta biharamunetik zenbatzen hasita. Halaber, egoki iritzitako beste edozein errekurtsio aurkeztu ahal izango da.

Hau da onartu den araudiaren testua:

Animaliak babesteari eta edukitzeari buruzko Erreneriako udal ordenantza.

Aurkibidea.

Zioen adierazpena.

I. titulua. Xedea, aplikazio-eremua eta definizioak.

1. artikulua. Xedea eta aplikazio-eremua.

2. artikulua. Salbuespenak.

3. artikulua. Definizioak.

II. titulua. Herritarren parte-hartzea eta animaliak babesteko erakundeak. Animaliak babesteko zentroak.

4. artikulua. Animaliak babesteko eta defendatzeko erakundeak.

5. artikulua. Animaliei buruzko udal informazioa eskuratzea.

6. artikulua. Animalien babesaren alorrean parte hartzea.

7. artikulua. Animaliak babesteko zentroak.

III. titulua. Animaliak babesteko erregimen juridikoa.

8. artikulua. Animaliak babesteko betebeharra.

9. artikulua. Debekuak.

IV. titulua. Animaliak edukitzearen inguruko erregimen juridikoa.

I. kapitulua. Arau orokorrak.

10. artikulua. Animalien jabeen betebeharrak.

11. artikulua. Animaliak egotea bide eta espazio publikoetan.

12. artikulua. Txakurrak ateratzea parke, lorategi publiko eta eremu naturaletan.

13. artikulua. Animaliak hiltzea.

14. artikulua. Animaliak identifikatzea.

15. artikulua. Edukitzearen mugak.

16. artikulua. Osasun publikoa babestea.

17. artikulua. Abandonatutako txakurrak.

18. artikulua. Animalia abandonatuekin jarduteko prozedura.

19. artikulua. Animalia hilak jasotzea.

20. artikulua. Txakurrak eraso egiten duenean jarraitu beharreko prozedura.

21. artikulua. Laguntza-txakurrak.

22. artikulua. Garraio publikoa.

23. artikulua. Konpainiako animaliak Europako Erkidegoaren barruan lekuz aldatzea.

24. artikulua. Txakurren erregimen orokorra.

II. kapitulua. Arriskutsuak izan daitezkeen animaliei buruzko berariazko xedapenak.

25. artikulua. Erregimen orokorra.

26. artikulua. Lizentzia.

27. artikulua. Arriskutsuak izan daitezkeen animalien erregistroa.

28. artikulua. Segurtasun-neurriak.

29. artikulua. Salbuespenak.

30. artikulua. Garraioa.

V. titulua. Animaliekin zerikusia duten jarduerak.

I. kapitulua. Gune zoologikoak.

31. artikulua. Erregimen orokorra.

32. artikulua. Albaitaritzazentroak eta animaliak merkaturatzeko establezimenduak.

II. kapitulua. Lurzoru publikoko jarduerak.

33. artikulua. Ehiza-jarduerak.

34. artikulua. Zirkuak eta antzekoak.

35. artikulua. Bestelako jarduerak.

III. kapitulua. Txakur-parkeak.

36. artikulua. Definizioa.

37. artikulua. Txakurrentzako eremuak erabiltzeko nahitaez bete beharreko arauak.

VI. titulua. Zigortzeko erregimena.

I. kapitulua. Xedapen orokorrak.

38. artikulua. Ikuskapena eta kontrola.

39. artikulua. Arau-hausteak eta zigorrak.

1. atala. Arauak haustea.

40. artikulua. Arau-hausteak.

41. artikulua. Zigorrak.

42. artikulua. Zigortzeko eskumena.

II. kapitulua. Zigortzeko prozedura.

43. artikulua. Prozedura.

44. artikulua. Auzibide penala.

45. artikulua. AIEOari jakinaraztea.

Azken xedapena.

Xedapen Indargabetzailea.

ANIMALIAK BABESTEARI ETA EDUKITZEARI BURUZKO ERRENTERRIAKO UDAL ORDENANTZA

ZIOEN ADIERAZPENA

Gizakia antzinatik bizi da beste espezieetako animaliekin. Alabaina, hiri-inguruneetan geroz eta bestelako animalia gehiago izaten da azkenaldian.

Gure inguruko gizartearen garapen ekonomikoarekin batera, gizartea, kultura eta ingurumena ere garatu dira, eta hori agerian geratzen da animalien munduko eta biodibertsitate osoko izaki biziak errespetatzeko exijentziarekin, bereziki gizakiarengandik gertuen dauden eta berarekin bizi diren animaliei dagokienez. Gainera, geroz eta ugariagoak dira animaliek kontzientzia-maila desberdinak dituztela dioten ikerketa zientifikoak, bereziki hegazti eta ugaztunen ingurukoak.

Denborarekin, bien arteko harremana aldatu egin da, eta horrek eragin du azken hamarkadetan sortzea animaliak eskubideen subjektu gisa hartzearen aldeko korrante ideologiko eta pentsamendu berriak.

Animalien ongizatearen inguruko kezka ere agerikoa da, bai erakundeetan, bai arauetan. Animalien Eskubideen Aldarrikapen Unibertsala 1978ko urriaren 27an onartu zuen Unescok, eta Nazio Batuek ere berretsi zuten. Aldarrikapen horretan jasotzen dira animalien oinarrizko eskubideak, eta aitortzen du animaliak errespetatzeak lotura duela pertsonen elkar errespetatzearekin.

Bestalde, Europako Batzordea jakitun da animaliak errespetatu eta babestu behar direnaz, eta hala jasotzen du animaliek garraioan, ikuskizun publikoetan, ehizan, abeltegietan, gune zoologikoetan, laborategietan eta abarretan jasotzen duten tratua erregulatzeko arauetan.

Euskadin animaliak babestearen inguruko oinarrizko legeriaren (6/1993 Legea, urriaren 29koa, Animaliak Babestekoa) helburua da arauak ezartzea Euskal Autonomia Erkidegoan dauden etxebereak, animalia etxekotuak eta itxian dauden basatiak babesteko, bertan erroldatuta edo erregistratuta egon ala ez eta jabeak edo edukitzaileak egoitza edonon duela ere.

Bestalde, Errenteriako Udalak 1998tik badu Txakurak Eduki eta Zaintzeko Ordenantza. Alabaina, erakundeetan eta gizartean animalien ongizatearen alde egiten duen errealitate berriaren aurrean, eta gizakiaren etxeko eta etxekotutako bestelako animalia-espezieen arteko harremanak arautzearen, Animaliak Babesteari eta Edukitzeari buruzko Errenteriako Ordenantza berria egin da.

Udalaren arau berri honek, animalien edukitza arautzeaz gain, hainbat betebeharrak ezartzen dizkie Udalari eta animalien edukitzaile eta titularrei, animaliek gizartean eragin ditzaketen arriskuak minimizatzeko, bizikidetzaren egokia izan dadin saiartzeko eta azpimarratuta animaliak edukitzeak ardura eskatzen duela, hala animaliarekiko tratuari dagokionez nola herrian bizikidete ditugun gainerako pertsonetikiko begirune eta errespetuari dagokienez.

Alabaina, helburu honekin batera, Ordenantza honen xede nagusietariko bat da bermatzea pertsonen eta animalien arteko bizikidetzaren ona izango dela. Sustatzen du animalien ongizatearen kontzeptua, saiaturik bermatzen beren izaeraren arabera bizitzaren dutela eta jasotzen dituztela animaliek jaso beharreko gutxienezko

arretak, tratuari, gizakiarekiko harremani, higienari, zaintzari, babesari eta garraioari dagokienez, horrela garapen integral eta naturala laguntzeko.

Hartara, Ordenantza honen xedea da animaliak babestea eta laguntzea ongizatean bizi daitezen, bermatzea arduraz zaintzen dituztela eta gutxitzea abandonuak, habitat naturalen eta espezie basatien gaineko afekzioa, behin eta berriro gertatzen diren galtzeak eta kontrolik gabeko ugaltzeak, minimizatuta ingumen-osasunerako arriskuak eta mantenduta pertsona, ondasun eta animalien lasaitasuna, osasun publikoa eta segurtasuna. Horretarako, Ordenantza honek ezartzen ditu beste hainbat arlotarako arauak ere: establezimendu espezializatuetakoko egonaldia, osasun-arreta, merkaturatzea eta salmenta, ikuskizun publikoak, eremu zoologikoak, kaleko jarduerak, txakur-parkeak, bilketa, identifikazioa, sakrifizioa edo esterilizazioa.

Pertsonen eta animalien arteko bizikidetza hobea sustatzearren, Ordenantza honek lagundu nahi du animalien gaitasuna eta errespetua hobetzen, gizarte moderno eta justu baten jarrerak sustatuko dituen hezkuntzarako oinarriak ezarrita Erreterian.

I. TITULUA

XEDEA, APLIKAZIO-EREMUA ETA DEFINIZIOAK

1. artikulua. Xedea eta aplikazio-eremua.

Ordenantza honen xedea da arauak ezartzea animaliak babestu, eduki, erakutsi, erabili eta merkaturatzeko, horien eta pertsonen arteko bizikidetza harmonizatuta, prebenitzeko edo ahalik eta gehien gutxitzeko osasun publikorako balizko arriskuak eta ingurumenaren gaineko eragin negatiboak, pertsonen eta ondasunen lasaitasuna eta segurtasuna lortze aldera.

Araudi hau aplikatzen da Europako, Estatuko eta Euskadiko animalien babesaren eta edukitzaren inguruko araudiaren baitan. Halaber, arautzen du arriskutsuak izan daitezkeen animalien edukitza, eta jasotzen dira lizentzien beharra, baldintza orokorrak eta erregistroen erregimena.

Ordenantza honen aplikazio-eremua da Erreteria, animaliak bertan erroldatuta edo erregistratuta egon ala ez, eta edozein lekutan bizi direlarik ere animalien jabeak edo edukitzaileak (animalien ardura dutenak).

2. artikulua. Salbuespenak.

1. Ordenantza honen esparrutik kanpo geratzen dira eta araudi propioak zuzenduko ditu hauek:

- a) Ehiza.
- b) Arrantza.
- c) Natura basatia eta natura-ingurunea babestea eta kontserbatzea.
- d) Zezenak.
- e) Animaliak erabiltzea esperimentuetarako edo bestelako helburu zientifikoetarako.

2. Alabaina, gatibu dauden animalia basatiei edo beren natura-ingurunera itzultzeko hazi direnei aplikatuko zaizkie Animaliak babesteko 6/1993 Legearen 4.1 eta 2 artikuluetan xedatutakoa eta, oro har, osasunari buruzkoak eta abandonatu, jaso, barnerratu, isolatu edo sakrifikatzearen ingurukoak.

3. artikulua. Definizioak.

Ordenantza honi dagozkionetarako, definizio hauek baliatuko dira:

1. Jabea: Euskal Autonomia Erkidegoko edo beste autonomia erkidegoetako Animaliak Identifikatzeko Erregistro Orokorrean hala jasota ageri dena. Ez bada inor ageri erregistroan, orobat joko da jabetzat identifikazio elektronikorik gabeko animalia bat duena eta haren jabe gisa jarduten dena.
2. Edukitzailea: jabe izan gabe ere, aldi batez animalia bat berekin duen pertsona, dela soilik zaintzeko, dela zaintza legalerako.
3. Etxeko animalia: bizirik irauteko gizakien laguntasuna ezinbestekoa duena.
4. Etxekotutako animalia: basoan eta aske jaiotako arren gizakiak ikustera eta lagun izatera ohitu eta orain bizirik irauteko haien zaintza eta arreta dutenak.
5. Animalia basatiak: basati bizi diren animalia autoktonoak nahiz autoktono ez direnak.
6. Hiriko animalia basatiak: hiri eta herrietako hiriguneetan bizi diren animalia basatiak, lurralde geografikoa pertsonekin partekatzen dutenak.
7. Itxian dauden animalia basatiak: basoan nahiz itxian jaiotako izan, gatibu bizi direnak –baina ez etxekotuak izateko ikaskuntza-egoeran–.
8. Arriskutsuak izan daitezkeen animaliak dira:
 - a) Basatiak izanik ere etxe-abere edo konpainiako animalia gisa erabiltzen direnak, baldin eta, beren oldarkortasuna gorabehera, gizakiak edo beste animalia batzuk hiltzeko edo gauzei kalteak eragiteko ahalmena duten espezie edo arrazetakoak badira.
 - b) Halaber, arriskutsuak izan daitezkeen animaliatzat joko dira arauz hala erabakitzen den etxe-abereak edo konpainiakoak; bereziki, ekainaren 1eko 101/2004 Dekretuaren I. eta II. eranskinetan zehaztuta dauden espezieetako txakurrak, baita dekretu horren 10.1.c) artikulua ildotik halakotzat jotzen direnak ere.
9. Beren ezaugarri etologikoak direla-eta udal agintariak edukitze-erregimen bereziaren mende jartzen dituzten txakurrak edukitzeko baldintza bereziak bete behar dira.
10. Abandonatzea: edonork jabe gisa dagozkion betebeharrei bere borondatez uko egitea, onuradun jakinik izendatu gabe. Halaber, ulertuko da animalia abandonatu dutela ez doanean inorekin edo animaliak identifikazioa badarama eta jabeak edo animaliaaren ardura duen pertsonak ez badu salatu galdu duela.
11. Konpainiako animalia: Pertsonak, konpainia egin diezaien –eta tartean irabazizko jarduerarik izan gabe– normalean etxean eduki ohi duten etxeko animalia. Aipatutako animalia horiek pertsonen zaintza eta arreta behar izaten dute bizirauteko.
12. Ustiapenerako animalia: Giza ingurunera egokituta, gizakiak etekina ateratzeko mantentzen dituen animaliak, etekina lortuta ere animalietatik beretatik edo sortzen dituzten produkzioetatik.
13. Laguntza-txakurra: bertako edo atzerriko zentroetan trebatutako animalia, desgaitasun, nahasmendu edo gaixotasun jakinen baten duten pertsonak laguntzeko, gidatzeko eta sorosteko.
14. Katu-kolonia urbanoak: kaleko katuen taldeak, hiriko edo gune pribatuetako zenbait eremutan asentatzen direnak eta erdi-askatasuneko egoeran bizi direnak.

15. Gune zoologikoa izango da animaliak mantendu, hazi edo saltzen dituen zentro, establezimendu edo instalazio oro, izan jarduera nagusi ala ez eta merkataritzako helburua izan ala ez, betiere Gune Zoologikoei buruzko apirilaren 11ko 81/2006 Dekretuan ezarritakoaren arabera.

II. TITULUA

HERRITARREN PARTE-HARTZEA ETA ANIMALIAK BABESTEKO ERAKUNDEAK. ANIMALIAK BABESTEKO ZENTROAK

4. artikulua. Animaliak babesteko eta defendatzeko erakundeak.

1. Ordenantza honetan xedatutakoaren arabera, animaliak babesteko erakundetzat joko dira legez eraturako irabazi-asmorik gabeko elkarteak, baldin eta beren helburu nagusien artean badago animaliak babestea.

2. Nagusiki elkarte horiekin hitzartu ahal izango ditu Udalak animaliak babestera zuzendutako jarduerak, eta, bereziki, zeregin hauek:

a) Kaleko animaliak, galduak nahiz abandonatuak, baita jabeek emandakoak, administrazioek konfiskatutakoak eta osasun arrazoiengatik bakartuta egon behar dutenak ere jaso edo bere instalazioetan edukitzea.

b) Instalazio horiek erabiltzea animalia abandonatuak, jaberik gabeak, administrazioek konfiskatutakoak edo osasun arrazoiengatik bakartuta egon behar dutenak zaindu eta tratatzeko.

c) Animaliak besteri lagatzeko izapideak egitea, Errenteriako Udalak finkatutako jarraibideak eta ordenantza hau aintzat harturik.

d) Animaliak modu eraginkorragoan babesteko egoki irizten dieten neurriak proposatzea Errenteriako Udalari.

e) Animaliak babestearen inguruko jarduerak eta kanpainak egitea.

3. Errenteriako Udalak hitzarmenak egin ahal izango ditu animaliak babesteko elkarteekin, animalia abandonatu, zauritu edo gaixoak kudeatzeko.

4. Elkarte horiek interesatutzat hartuko dira animaliak babestearen inguruko prozedura zigortzaileetan, hurrengo legeetan xedatutakoaren ildotik: Euskal Administrazio Publikoen Zigortzeko Ahalmenari buruzko otsailaren 20ko 2/1998 Legean, Administrazio Prozedura Erkidearen urriaren 1eko 39/2015 Legean, eta Sektore Publikoko Erregimen Juridikoaren urriaren 1eko 40/2015 Legean.

5. artikulua. Animaliei buruzko informazioa eskuratzea.

Herritarrek eta elkarteek eskatu ahal izango dute, horretarako ezarritako bideen bitartez, udal-jarduerari eta horien aurrekariari buruzko informazioa eta, oro har, animalien babesaren inguruan Udalak ematen dituen zerbitzu eta jarduerari buruzkoa, indarrean dauden lege-xedapenen arabera.

6. artikulua. Animalien babesaren alorrean parte hartzea.

1. Animaliak babesteko eta defendatzeko erakundeek Udalaren eskumeneko auzietan parte hartu ahal izango dute herritarren parte-hartzeari buruzko arauetan aurreikusitakoaren arabera.

2. Errenteriako Udalak sustatu ahal izango du Animalien Ongizaterako Batzordea sor dadin. Batzorde horren antolamendua eta helburuak arautu egingo dira.

7. artikulua. Animaliak babesteko zentroak.

1. Errenteriako Udalak animaliak babesteko zentroekin edo elkarteekin hitzartu ahal izango du abandonatu, galdu edo dekomisatu diren animaliei ostatu ematea, berreskuratzen, lagatzen edo, salbuespenezko kasuetan, eutanasia-prozeduren bidez sakrifikatzen diren arte.

2. Animaliak atzeman eta garraiatzeko bitartekoek, baita animaliak babesteko zentroetako instalazioek ere, higiene- eta osasun-egoera egokian egon beharko dute, animaliei ahalik eta traumarik gutxien eragitekoak izan beharko dute eta langile gaituek baliatu beharko dituzte.

3. Animaliak babesteko zentroek berariazko araudian eta gune zoologikoei buruzkoan ezarritako betekizunak bete beharko dituzte.

4. Zentro horiek ezarritako gehienezko egonaldia gainditu duten animaliak laga, adopzioan eman, edo beste aukera batzuk sustatzeko programak izan beharko dituzte, beren osasun egoera edo jarrera kontuan hartuta, albaitaritza zerbitzuek kontrakoa irizten dioten kasuetan izan ezik.

5. Udalak edo animaliak babesteko elkarteak titular berriei ematen dizkien animaliek baldintza hauek bete beharko dituzte:

a) Identifikatuta egon beharko dute.

b) Desparasitatuta, txertoak jarrita eta, ahal dela, esterilizatuta egongo dira.

c) Bere ezaugarriak eta behar higieniko-sanitarioak, etologikoak eta animalia-ongizatekoak jasotzen dituen dokumentu batekin entregatuko dira.

6. Aldi baterako zaintzan edo lagapeneko bestelako kasuetan entregatzen diren animaliek baldintza hauetan egon beharko dute:

a) Animaliak Babesteko Elkartearen liburuetan erregistratuta.

b) Desparasitatuta, txertoak jarrita eta esterilizatuta.

7. Errenteriako Udalak dena delako erregistroari jakinarazi beharko dizkio animalia-ongizatearen jabe berriaren datuak.

III. TITULUA

ANIMALIAK BABESTEKO ERREGIMEN JURIDIKOA

8. artikulua. Animaliak babesteko betebeharra.

Hiri iraunkorra izateko konpromisoa aintzat hartuta, eta bere eskumenen eremuan, Errenteriako Udalak animaliak babesteko betebeharra dauka, indarrean dagoen legeari jarraiki. Errenteriako Udalak animaliekiko sentiberatasuna eta errespetua sustatuko ditu.

Horretarako, Udalak sentsibilizazio-kanpainak egin ahal izango ditu animaliak edukitzearen, abandonatzearen edo tratu txarrak ematearen inguruan, betiere gutxiago abandona ditzaten, haien

ongizatea hobetu, tratu txarrak desagerrarazi eta beste animalia-espezie batzuekiko enpatia sustatzearen.

Halaber, Errenteriako Udala jakitun da eredia izan behar duela herritarrentzat. Hartara, egoki diren neurriak hartuko ditu animaliak babesteko jaietako eta aisialdiko jardueretan, bere jabetzako lurretan egiten diren ekitaldietan, kontratazioetan, programazioetan,...

9. artikulua. Debekuak.

Berariaz debekatuta egongo da:

1. Animaliei tratu txarra ematea, edo sufrimendua, mina edo bidegabeko larritasuna eragin liezaiekeen edozein jardueraren pean jartzea.
2. Animaliak abandonatzea.
3. Bizirik irauteko beharrezko elikadura ez ematea edota higiene- eta osasun-ikuspuntutik desagokiak diren establezimenduetan edukitzea, animalia-ongizateari eta segurtasunari dagokionez.
4. Animaliei mutilazioak egitea, salbu eta ezinbestean, arrazoi funtzionalak direla medio, albaitariaren kontrolpean egiten direnak.
5. Txakurrak etengabe lotuta edukitzea.
6. Animaliei alkohola, drogak edo botikak ematea, edo kalte fisikoa edo psikikoa eragin liezaiekeen edozein manipulazio artifizial egitea, nahiz eta lehiaketa batean errendimendua handitzeko izan.
7. Beren izaerari ez dagozkion portaera edo jarrera desagokiak harraraztea, edo tratu laidoztagarria ematea.
8. Animaliak borroketarako erabiltzea.
9. Animaliak bide publikoan hiltzea, nahitaezkoa edo ezinbestekoa denean izan ezik.
10. Animaliak saldu, eman edo lagatzea adingabeei (legez finkatutakoari jarraiki) edo ezgai diren pertsoneri haien guraso-agintea edo tutoretza dutenen baimenik gabe.
11. Animalien salmenta ibiltaria burutzea kalean, berariaz baimendutako azoka edo merkatuetan izan ezik.
12. Merkaturatu ezin diren espezie zinegetikoen salerosketa.
13. Laborategi edo klinikei animaliak saltzea, administrazioaren kontrolik gabe.
14. Animaliak publizitate-erakargarri, sari edo donari gisa ematea, haien kostu bidezko salerosketaren ondorio diren negozio juridikoak salbu.
15. Babestutako eta mehatxatutako espezieetako animaliak saltzea edo erostea, baita halakorik edukitzea eta jendaurrean erakustea ere, berariazko legerian jasotakoaren ildotik.
16. Horretarako berariazko baimenik gabe animalia basatiei eta hiriko basatiei kontrolik gabe jaten ematea bide publiko, orube, erreka eta abarretan.
17. Era berean, debekatuta egongo da edozein espezieetako animalien hiltzak uztea bide publikoan edo hondakinak gaika biltzeko edukiontzietan, eta halakorik suertatuz gero udal-

zerbitzuei jakinarazi beharko zaie, egokitzat jotzen duten moduan joka dezaten. Puntu honetan, bete beharko da Errenteriako etxeko eta merkataritzako hondakinen udal-ordenantzak xedatutakoa ere.

18. Animaliekiko krudeltasuna, tratu txarra edo sufrimendua erakusten duten fikzioko eszenak filmatu, argazkiak atera edo edozein komunikazio-euskarritan grabatzea, administrazio autonomikoan eskumenak dituen organoari jakinarazi gabe –itxuraz animalari eragindako mina benetan fikzio huts dela egiaztatu ahal dezan–.

19. Ibilgailuak animalien ohiko bizilekutzat baliatzea. Halaber, barruan animalia bat duten ibilgailuek ezingo dute egon bi ordutik gora kalean aparkatuta, eta udako hilabeteetan nahiz bero egiten duen egunetan denbora guztian itzalean dagoen lekuren batean utzi beharko dira, eta behar bezala aireztatuta egon beharko dute une oro.

20. Bizilagunei eta hirugarrenei enbarazu egitea behin eta berriz, erosotasunari eta osasun publikoari eragiten dieten jardunekin (gehiegizko zaunkak, higiene-arazoak, etab.), bereziki gauez eta jaiegunetan.

21. Animaliak baliatzea ikuskizunetan, zirkuetan, filmazioetan, publizitate jardueretan, kultur nahiz erlijio ospakizunetan eta beste edozein jardueratan, baldin eta horrekin mina eragingo bazaie, edo sufrimendua, degradazioa, parodia, iseka edo naturaz kontrako trataera badakarte berekin, edo ikusten dutenak mindu baditzakete.

22. Animalia etxekotuak nahiz gatibu dauden basa animaliak erabiltzea zirku eta ikuskizunetan. Halaber, zezen-ikuskizunak (zezenketa, sokamuturra, ahari-dema, etab.) edo antzekoak egitea kalean edo instalazio itxietan, aisialdiko helburuetarako.

23. Animaliak parke eta lorategi publikoetan eta hiri-lurretan egotea estabulazioko edo erdi-estabulazioko erregimenean.

24. Debekatua dago animaliak izatea lurzoru urbanizagarriko eta ez-urbanizagarriko baratzeetan, baserriei edo baimendutako landako etxebizitzetara lotutako edo horien erabilerako lur-sailetan izan ezik.

25. Animaliei tratu txarrak emateko aurrekariak dituztenek animaliak adoptatzea.

26. Kalean partikularrek iragarkiak jartzea animaliak saldu edo trukatzeko.

27. Animaliak bainatu edo garbitzea iturrietan eta leku publikoetan.

28. Animalien gorotzak kalean uztea.

29. Debekatuta dago edozein animalari tratu txarra edo heriotza eragiten dioten aisialdiko jarduerak burutzea.

30. Leku publikoetan pertsonak ura edateko dauden iturrietatik zuzenean edaten uztea animaliei. Azken hauek edan ahal izango dute soilik urarekin kontaktuan.

31. Animaliak haur jolasetarako esparruetan –zabuak, txirristak, parkeak eta abar– ibiltzea eta egotea.

32. Animaliak sartzea eta egotea elikagaiak fabrikatu, saldu, biltegitatu, erakutsi, merkaturatu, garraiatu edo manipulatzeko diren lokal edo ibilgailuetan, Ordenantza honen 16. artikuluan xedatutakoari jarraiki.

33. Debekatuta dago animaliak sartzea eta egotea ikuskizun publikoak egiten diren lokal, barruti eta espazioetan, bai eta igerileku publiko, lokal sanitario eta antzekoetan eta hezkuntzako, kulturako edo aisialdiko konkurrentzia publikoko establezimenduetan ere, berariazko baimenik gabe.

34. Garraio publikoko ibilgailuetan animaliak eramatea pertsonentzako eserlekuetan.

IV. TITULUA

ANIMALIAK EDUKITZEAREN INGURUKO ERREGIMEN JURIDIKOA

I. KAPITULUA. ARAU OROKORRAK

10. artikulua. *Animalien jabeen betebeharrak.*

1. Edozein animalia jabeak higie- eta osasun-baldintza onetan eduki beharko du hura, aterperako instalazio egokiak, janaria eta edaria, albaitaritza-laguntza eta ariketa fisikorako aukera eman, eta haren beharrian fisiologiko eta etologikoen arabera arreta eskaini, animalia espezia eta arraza kontuan izanda. Horretaz gain, segurtasun-baldintza egokietan eduki beharra daukate, auzokoentzat, ondasunentzat edo animalientzat berarentzat inongo arrisku edo enbarazu-egoerarik gerta ez dadin. Kode Zibilaren 1905. artikuluan xedatutakoaren ildotik, animalia jabea izango da hark sortzen dituen kalte, galera eta eragozpenen erantzule.

2. Bereziki, animalien mantenurako gutxieneko baldintza hauek finkatzen dira:

a) Edateko ura eta nahikoa jaki –orekatua– ematea, nutrizio- eta osasun-maila egokia izan dezaten.

b) Sufri ez dezaten, ongi egon daitezen eta bizi-beharrak ase ditzaten beharrezko den lekua edukitzea, aireztapen, hezetasun, tenperatura, argitasun eta estalpe egokiekin.

c) Bizilekuak garbi, desinfektatuta eta desintsektatuta edukitzea, eta aldian-aldian gorozkiak eta pixa kentzea.

d) Ezin izango da animaliarik eduki ohiko bizileku gisa edo ukuiluratu ibilgailu, balkoi, terraza, garaje, pabiloi, soto, teilatu-lau, lorategi edo hiriko beste edozein lokal edo lur-sailetan, baldin eta horrek auzokoei edo iragaileei enbarazu egiten badie, animalientzat higie, osasun eta ongizatearen aldetik leku desegokia bada, edo behar bezala zaintzea galarazten badu.

e) Beren ezaugarri etologikoak aintzat hartuta, gutxieneko espazioa izan beharko dute animaliek, Gune Zoologikoei buruzko 81/2006 Dekretuan xedatutakoari jarraiki.

f) Animaliak ibilgailu pribatuetan garraiatzekotan, nahikoa leku izan beharko da horietan, estalpean, muturreko eguraldi-egoeretatik babestua. Halaber, animaliak gidariari enbarazurik ez egiteko eta trafikoaren segurtasuna arriskuan ez jartzeko moduan egin beharko da garraioa, eta ikuspuntu etologiko edo fisiologikotik animaliei egoera desegokirik jasanarazi beharrik ez izateko moduan.

g) Txakurrek ezingo dute lotuta egon 8 orduetik gora jarraian. Hortaz, denbora horretara iritsiz gero, ordu erdiko ariketaldia eskaini beharko diete jabeek. Era berean, ezingo dira lokal edo etxeetan hiru egunetik gora jarraian bakarrik geratu.

h) Obrak zaintzeko zakurrak erabiltzen dituzten pertsona edo enpresek elikagai, ostatu eta zaintza egokia eman beharko diete. Animalia herrian egongo bada soilik obra burutzeko behar den denboran, jabeek inskribatu beharko dituzten txakurren erroldan iragaitzazko gisa, eta baja eman beharko diete jarduera bukatutakoan.

i) Erroldatuta edo erregistratuta eduki beharreko animalia baten bat galduz gero, salatu egin beharko du jabeak edo hark baimendutako norbaitek.

j) Txakurrek leku jakin batean lotuta egon behar badute, lotzeko uhalak hiru metrokoak izango dira gutxienez. Animaliak eskura eta eroso iristeko moduan izan behar ditu babeslekua eta edateko ura duen ontziren bat.

k) Etxebizitzak, eraikinak edo horien sarreran dauden jabetzak zaintzeko eta babesteko zakurrak badira, lotuta daudela ikusi beharko da eta ez diete hirugarrenei segurtasun faltarik edo arriskurik eragingo.

l) Baserri, etxebizitza eta landako eraikin eta lursailak zeharkatzen dituzten Udal Herribide-Sareko bideetan, txakur bat lotuta badago horien segurtasuna babesteko, animalia gehienez iritsi ahal izango da herribidearen kanpoko mugatik bi metroetara.

11. artikulua. Animaliak egotea bide eta espazio publikoetan.

1. Etxe-abereen jabeek beti zaindu beharko dute horiek ez dituztela espazio publikoak eta eraikinen fatxadak kaltetzen edo zikintzen. Jarrera hauek beteko dituztela zaindu beharko dute bereziki:

a) Animalia baten jabeak edo hura berekin daukanak behar diren neurriak hartu beharko ditu haren gorozkiak hiriko bide, parke eta espazio publikoetan, lorategietan eta, oro har, apaingarri edo pertsonen igarobide den edozein tokitan botata gera ez daitezen. Nolanahi ere, animaliak gorotza bide publikoan uzten badu, animalia berekin daraman pertsona izango da hura kentzearen arduradun; hain zuzen ere, poltsa iragazgaitz batean sartu eta itxi ondoren, paperontziren batera edo udal-zerbitzuek jartzen dituzten bestelako ontzietara bota beharko du, edo jaso Errenteriako Etxeko eta Merkataritzako Hondakinen Udal Ordenantzak xedatutakoaren arabera.

b) Artikulu honetan xedatutakoa betetzen ez denean, udaltzainek jabeari eskatu ahal izango diote gorozkiak jasotzeko.

c) Eraikinen jabeek -ahal den neurrian- haien jabetzetan esku hartu beharko dute usoak, katioak edo bestelako espezie batzuk kontrolik gabe ugal ez daitezen eta, bereziki, eragotzi beharko dute habiak egin ditzatela. Neurri horiek ez dituzte animaliak akabatuko.

d) Txakurren jabeak edo txakurrak daramatzatenean ez diete animalia horiei utziko haur parke, lorategi, parterre edo udal-baratzeen parkeetan sartzeko, Udalak hala adierazten duenean seinaleen bidez. Horrez gain, Udalak exijituko die ordain ditzaten udal-ondasun eta -instalazioetan eragindako kalteak.

2. Bizilekua kalea duten espezieetako animalien kontrolik gabeko ugalketak hala eskatzen badu, behar diren neurriak hartuko dituzte udal-agintariek haien populazioa kontrolatzeko, eta, hortaz, gerora akabatu beharrik ez izateko.

3. Udalak katu-kolonien Kudeaketa aztertu ahalko du felidoen populazioa kontrolatzeko. Erabili beharreko metodoa harrapaketa, esterilizazioa eta askatzea izanen da. Udaleku horietan animaliak modu kontrolatuan elkartuko dira, behar bezala identifikatuta eta esterilizatuta, irabazi asmorik gabeko erakunde eta gizarte-entitateen ardurapeko espazio publikoetan.

12. artikulua. Txakurrak ateratzea parke, lorategi publiko eta eremu naturaletan.

1. Hiriko kale, parke eta leku publikoetan, animaliak kontrolpean eraman beharko dira, Udalak berariaz baimendutako lekuetan izan ezik; animaliek zer ezaugarri dituzten, horren arabera egoki den eta gehienez bi metroko luzera izan beharko duen katearekin, uhalarekin edo beste sistemaren batekin lotuta ibili beharko dute.

2. Ordenantza honen V. Tituluaren III. Kapituluan arautzen dira txakur-parkeak.

3. Nolanahi ere, eta udalerrri osoko lurraldean, txakurren jabe edo edukitzaileek haien gaineko kontrola eduki beharko dute une oro, pertsoneri eta gainerako animaliei eta basa faunari enbarazu eta kalterik eragin ez diezaieten, ezta ondasun edo instalazio publikoetan kalterik ere. Hori dela eta, begien bistan eduki beharko dute txakurra, behar izanez gero esku hartu ahal izateko moduko distantzian.

4. Udalerrriko eremu naturaletako baso, mendi eta larre eremuetan, basa faunaren eta abereen garapenaren zikloan (elikadura, aterpea eta ugalketa) kalterik ez eragiteko helburuarekin, txakurrak lotuta joango dira.

5. Udalerrriko katuen presentziaren ondorioz animalia basatien gainean, hirikoak ala ez, kalteak daudela frogatzen bada, lehenengoan gain kontrol neurriak ezarriko dira.

6. Horrez gain, exijituko zaie udal-ondasun eta -instalazioetan eragindako kalteen ordainak emateko, eta epaitegietara bideratuko dira egoki diren erantzukizun zibil eta penalak.

13. artikulua. Animaliak hiltzea.

Animalia baten jabeak edo hura berekin duenak uste badu animaliak gaitz kutsakorren bat izan dezakeela, albaitariari jakinarazi beharko dio. Diagnostikoaren emaitza positiboa bada, eta, beraz, pertsonak (zoonosia) nahiz animaliak kutsatzeko arriskua badago, eskumena duen agintariari jakinarazi beharko dio, nahitaezkoa bada. Tratamendua emateko aukerarik ez badago, eta albaitariak hala erabakitzen badu, hil egin beharko da animalia, baimendutako eutanasia-prozedura baliatuta, eta albaitariaren kontrolpean eta ardurapean. Gainera, albaitariak egiaztatu egin beharko du animalia heriotza.

Era berean, oinazea eragiten duten gaixotasun kroniko sendaezinak edo mutilazio mingarriak dituzten animaliak, baita oinaze handi eta baretu ezinak dituztenak ere, hil egin beharko dira.

Animaliarik hil behar bada, minik ematen ez duen prozeduraren baten bitartez hil beharko da eta indarrean dagoen araudiari jarraiki.

14. artikulua. Animaliak identifikatzea.

1. Txakurren jabeek zeinahi delarik ere jabetza-titulua identifikatuta eta ohiko bizilekua duten udalerrriko udaletxean erroldatuta eduki beharko dituzte txakurrak; horretarako, txakurrak jaiotzen direnetik edota eskuratzen dituztenetik kontatzen hasita hilabeteko epea izango dute edo jaioterritik alde egin artekoa. Betebehar hori izango dute Euskal Autonomia Erkidegoan modu iraunkorrean bizi diren edo hiru hilabete baino gehiago daramatzaten txakurren jabeek. Nahiz eta beste erregistroren batean inskribatuta egon, titulartasuna aldatu aurretik, beti erregistratu beharko dute EAEko Animaliak Identifikatzeko Erregistro Orokorrean aurrerantzean AIEO; erregistro hori sortu zen Nekazaritza eta Arrantzako sailburuaren 1993ko maiatzaren 5eko agindu bidez.

2. Mikrotxipa jarri aurretik, albaitariak egiaztatu beharko du animaliak beste mikrotxipik baduen dagoeneko. Baldin badu, egiaztatu beharko da erabilgarri dauden kontsultarako datu-baseren batean erregistratua dagoen (REIAC, PETMAXX, Europetnet). Arriskutsuak izan daitezkeen txakurrei dagokienez, gailu elektronikoa jarri aurretik, egiaztatuko da titularrak indarrean duela arriskutsuak izan daitezkeen txakurrak edukitzeko lizentzia. Identifikatzeko prozesuak hiru fase ditu, eta bata bestearen atzetik egin behar dira egintza berean:

a) Lehen fasean, txakurraren lepoaren ezkerraldean albaitari ofizial, foral edo municipal batek edo horretarako gaitutako albaitari pribatu batek mikrotxip edo elementu mikroelektroniko bat jarriko dio, betiere aplikatu beharreko araudiari jarraiki. Erabiltzen diren identifikadore elektronikoek bete beharko dituzte UNE-EN-ISO: 11784 eta UNE-EN-ISO: 11785 arauak eta izan beharko dute ICARek (International Committee of Animal Recording) onartuak, kodeen bateratasuna bermatzeko. Identifikatzeko gailu elektronikoak eskuratu beharko dira Euskal Autonomia erkidegoko albaitarien elkargo ofizialetan. Gailuak jarriko dira Nekazaritza eta Arrantzako sailburuaren 1993ko maiatzaren 5eko aginduaren arabera, horrek arautzen baitu Euskal Autonomia erkidegoan animaliak identifikatzeko bitarteko elektronikoen erabilera. Ondoren, egiaztatuko da mikrotxipa ondo irakurtzen dela.

b) Bigarren fasean, albaitaritza zerbitzu ofizial, foral edo municipalak edo albaitaritza zerbitzu pribatu gaituak sartuko ditu animalien eta jabearen datuak AIEO kudeatzeko aplikazio informatikoan. Jarraian, hiru aletan jaulkiko ditu identifikazioa eta AIEOn inskribatzeko eskaera egiaztatze dokumentua. Bi ale izango dira albaitari gaituarentzat, bat artxibo profesionalerako eta beste bat bidali beharko du Eusko Jaurlaritzan abeltzaintza-gaietan eskumena duen zuzendaritzara (Erregistroa kudeatzen duen organoa), titularraren NAN/AIZaren edo identifikazio-agiri baliokidearen kopiarekin batera, datuak aipatutako erregistroan inskribatzeko. Beste ale bat titularrarentzat izango da. Arriskutsuak izan daitezkeen txakurrak erregistratzerakoan, horiez gain erantsiko da jabearen indarreko lizentziaren kopia bat.

Mikrotxipa duten eta ezin datu-basetan erregistratuta ez dauden animalien kasuan, titularrak aurkeztuko du identifikazio-dokumentu ofizial bat edo, horrelakorik ezean, egungo jabearen edo edukitzailearen erantzukizunpeko adierazpena, adierazteko animalia legez duela. Halaber, jabeak jakinarazi beharko du mikrotxipa non eta nork jarri dion, informazio hori sartzeko AIEOren datu-basean, ondoren egiaztapenak egin ahal izateko.

c) Hirugarren fasean, albaitaritza zerbitzu ofizial, foral edo municipalak edo albaitari pribatu gaituak txakurraren Pasaporte-Liburuxka ofiziala jaulkiko du, Ekonomiaren Garapen eta Lehiakortasunerako sailburuaren 2015eko martxoaren 2ko aginduaren arabera beteta; agindu horrek onartzen zuen txakurren, katuen eta hudoen Txakurren Pasaporte-Liburuxka. Titularrak pertsona juridikoak badira, aurkeztu beharko dituzte Identifikazio Fiskaleko Zenbakia (IFK) eta animaliaz arduratuko den pertsonaren NAN/AIZ edo identifikazio-dokumentu baliokidea. Arriskutsua izan daitekeen txakurra bada, azken pertsona horrek eduki beharko du arriskutsuak izan daitezkeen txakurrak edukitzeko indarreko lizentzia administratiboa.

Albaitari gaituak altatik aurrera hilabete izango du AIEOk sortutako dokumentazioa posta ziurtatu bidez bidaltzeko Erregistroa kudeatzen duen organoari.

3. Ez erroldatzea arau-haustea izango da animaliak babesteari buruzko urriaren 29ko 6/1993 Legearen 27.1 a) artikuluan ezarritakoaren arabera.

4.1. Animalien jabeak AIEOri jakinarazi behar dio erregistroko datuen bat aldatzen bada. 10 eguneko epean eman beharko da horren berri. Txakurra galtzen bada edo norbaitek lapurtzen

badu, ordea, epea 5 egunekoa izango da, galtze- edo salaketa-egunetik aurrera kontatzen hasita. Zehazki, honako aldaketa hauen berri eman beharko du jabeak:

a) Jabeari edo txakurrari buruzko datuak aldatzea, bereziki, titularraren telefono-zenbakia eta helbidea, AIEOren erregistroaren aplikazioan egin beharko da. Gaitutako albaitariak edo Udalak bi aletan jaulkiko ditu txakurraren edo titularraren datuak aldatzeko dokumentuak, heriotzagatiko bajak, desagerpenak eta erasoak. Erasoak udalek soilik jaso ahal izango dituzte. Jarduketa hauetarako, kopia bat geratuko da albaitariaren artxibo profesionalean, eta, bestea, titularrarentzat izango da. AIEOra soilik bidali beharko da dokumentazioa jabea aldatzen denean edo beste autonomia erkidego batera joan direlako baja gertatzen denean.

b) Jabea aldatzea; jabe berriak eman beharko du horren berri.

c) Txakurrari baja ematea, hil egin delako edo Euskal Autonomia Erkidegotik kanpo eraman delako behin betiko. Beste norabait eramateaz gain jabea ere aldatzen bada, titularrak aldatzeko aurreikusitako dokumentazioa erantsi beharko da. Beste Autonomia-Erkidego batera eramateagatiko bajetarako ezinbestekoa da animalia-aren mikrotxipa irakurtzea. Behin aplikazioan aldatutakoan, hiru aletan jaulkiko da AIEOn eskaera egiteko inprimakia. Bi ale izango dira instantzia jardulearentzat –bat, artxibatze- eta bestea, erregistroaz arduratzen den organoari bidaltzeko–, eta hirugarren alea jabearentzat izango da.

d) Txakurra galtzea edo lapurtzea. Kasu honetan, gertatutakoa salatu beharko da 24 orduren barruan, eta ondoren zuzenean jakinaraziko da dagokion lurralde-erregistroan, gehienez ere 10 eguneko epean.

Arriskutsuak izan daitezkeen animaliak lapurtu edo galtzen badira, salaketa jarri beharko da aurreko paragrafoan adierazitako epean eta titularrak jakinarazi beharko du Arriskutsuak izan daitezkeen Animalien Udala-erregistroan, gertatutakoaren berri izan duen momentutik kontatzen hasita 48 orduko epean gehienez.

4.2. Salmenta, dohaintza edo, indarrean dagoen legerian ezarritako beste moduren bat erabilita, eskualdatze bat egiten denean, animalia-aren txipa irakurri beharko da eta parte hartzen duten aldeek aldaketa eskatzeko agiria bete beharko dute, lau aletan. Eskualdatzea egiaztatze-ko agiria bi aldeek sinatu badute, nahikoa izango da jabe berriak soilik sinatzea eskaera. Baliozkoa izango da eskualdatzea jasotzea txakurra identifikatzeko agiri ofizialean jabeari dagokion atalean; lehengo jabearen eta berriaren sinadurak izan beharko ditu. Bi ale geratuko dira instantzia jardulearen esku (bat, artxibatze-ko eta bestea, organo kudeatzaileari bidaltzeko), beste kopia bat txakurra eskualdatu duen pertsonaren esku eta, azkena, jabe berriaren esku. Eskualdatzearen ondorioz animalia-ri baja ematen bazaio AIEOn, lehengo jabea izango da, gaitutako albaitari-aren bidez, erregistroan baja jakinaraztearen arduradun, eta jabe berriaren NAN/AIZren edo identifikazio-dokumentu baliokidearen kopia erantsi beharko du helmugako autonomia-erkidegoan.

Titular berria ez badago AIEOn alta emanda eta Euskal Autonomia Erkidegoko udalerriren batean erroldatua badago, titularraren NAN/AIZren edo identifikazio-dokumentu baliokidearen kopia bat erantsi beharko du. Erregistroa kudeatzen duen organoari dokumentazioa bidali behar ez zaion kasuetan, albaitari gaituak hilabete izango du erregistroan baja ematen zaionetik kontatzen hasita.

Herri Administrazioen Administrazio Prozedura Erkidearen urriaren 1eko 39/2015 Legea eta Administrazio Elektronikoari buruzko otsailaren 21eko 21/2012 Dekretua aplikatuta, AIEOk

martxan jarriko du alta emateko eta datuak aldatzeko espedienteak elektronikoki tramitatzeko aukera. Albaitari gaituak, nahitaez elkargoko kide izan behar dutenez, administrazioarekin harremanak elektronikoki izatera behartuak daude eta sinadura elektronikoko baimenduko modalitate bat eskuratu beharko dute AIEOren aplikazio informatikorako sarbidea izateko.

4.3. Txakurra saldu edo eman ahal izateko nahitaezko baldintza izango da jabe berriari txakurra entregatzea behar bezala identifikatuta eta erroldatuta eta Txakurraren Kartilla Ofiziala eguneratua duela.

4.4. Artikulu honetan adierazi diren erroldatzeari buruzko aldaketak Erregistroari ez jakinaraztea arau-haustea izango da Animaliak Babesteko urriaren 29ko 6/1993 Legearen 27.1 a) artikuluan ezarritakoaren arabera.

15. artikulua. Edukitzearen mugak.

1. Oro har, baimenduta egongo da etxe-abereak edo etxekotutako animaliak etxe partikularretan edukitzea, baldin eta higie-, osasungarritasun-, ongizate- eta segurtasun-baldintzak betetzen badira, bai animalia-erentzat, bai pertsonentzat.

2. Eskumena duen udal-agintariak mugak jarri ahal izango dizkio animaliak edukitzeari nahiz eduki ahal diren animalien kopuruari, bizitokiaren ezaugarriak, instalazioen egokitasuna eta higie- eta osasun-egoera aintzat harturik, baita auzokoentzat nahiz beste edonorentzat, edo animalia-erentzat berarentzat edo beste animalia batzuentzat, arrisku edo enbarazu egoerarik sor daitekeen ere. Higiezinaren azaleraren arabera eduki daitezkeen animalien gehieneko kopuruari dagokionez, aplikagarri diren araudietan xedatutakoaren arabera jokatu da.

3. Halaber, animaliak zein egoeratan dauzkan jakiteko behar duen informazioa eta dokumentazioa eskatu ahal izango dio udal-agintari eskudunak interesdunari, baita haiek eskura jartzeko ere, bertatik bertara behatzeko.

4. Etxe partikularretan eta lokaletan etxe-aberarik haztekoan, higie-, osasungarritasun-, ongizate-, bizikidetz- eta segurtasun-baldintzak bete beharko dira, bai animalia-erentzat, bai pertsonentzat.

5. Animaliak leku komunitario pribatuetara –hala nola kultur edo olgeta-elkarteak–, etxejabe elkarten leku komunitario eta bestetara sartzeari eta bertan egoteari dagokionez, erakunde horien baitako arauen arabera jokatu da eta arauak ikusgai egongo dira.

6. Konpainiako animaliak ezingo dira igogailuetan igo edo jaitsi haiekin joan nahi ez dutela adierazten dutenekin batera.

16. artikulua. Osasun publikoa babestea.

Debekatuta dago jakiak lantzeko, saltzeko, gordetzeko, garraiatzeko, maneatzeko, kontsumitzeko edo saltzeko erabiltzen diren lokal edo ibilgailuetan txakurrak sartzeari eta bertan edukitzea. Ostalaritza-establezimendu publikoen jabeek –hala nola hotel, ostatu, pentsio, apartamentu eta antzekoak– animaliak bertara sartzeari eta bertan egotea galarazi ahal izango dute. Ageriko lekuan jarri beharko dituzte debeku-seinaleak. Nolanahi ere, sartzeari eta bertan egotea uztekoan, animaliek uhalez lotuta egotea eskatu beharko dute. Orobat, muturrekoa eraman beharko dute txakurren ezaugarriak eta izaera direla-eta komeni bada. Nahitaezkoa izango da muturrekoa jartzea arriskutsuak izan daitezkeen txakurrei.

Aurreko debekuetatik salbuetsita geratzen dira laguntza- eta segurtasun-txakurrak, salbu eta jakiak egin eta eskuztatzen diren lekuetara sartzeari dagokionean, izaera orokorreko debekua baita hori.

Debekatuta dago jendea pilatzen den lokaletan edo Udalarenetan animaliak sartzea eta edukitzea, salbu eta berriaz baimentzen bada.

Jendearentzat zabalik dauden bestelako establezimenduen jabeek horietara animaliak sartzea eta bertan egotea debekatu ahal izango dute, debekua argi ikusteko moduan adierazita sarreran.

Nahitaezkoa da kalera irteten diren katuak esterilizatzea.

17. artikulua. Abandonatutako txakurrak.

Animaliak Babesteko urriaren 29ko 6/1993 Legearen 14. artikuluan ezarritakoaren arabera, abandonatutako animaliatzat hartuko da identifikatu gabe dagoen eta bakar-bakarrik dabilena; animalia abandonatua izango da, halaber, nahiz eta identifikatuta egon, jabeak edo baimendutako pertsonak galdu egin dela salatzen ez badu horretarako ezarritako epean.

18. artikulua. Animalia abandonatuekin jarduteko prozedura.

1. Udalan eta Foru-Aldundian eskumena duten departamentuek jasoko dituzte abandonatutako txakurrak, bai eta identifikatuta egon arren jabearen inolako kontrolik gabe noraezean dabilzan txakurrak ere. Txakur horiek erakunde horien eskuetan egongo dira, harik eta berreskuratzen, lagatzen edo hiltzen diren arte.

Horretarako, Udalak langile eta instalazio egokiak izango ditu; orain arte, zerbitzu horiek hitzartu ditu Administrazioarekin lankidetzan diharduten animaliak babesteko eta defendatzeko elkarteekin. Halaber, hitzartu ahal izango du udalaz gaindiko erakundeekin, foru-aldundietako organo eskudunekin, edo Euskal Autonomia Erkidegoko gune zoologikoen baimen, erregistro eta kontrolari buruzko Dekretuaren arabera baimendutako txakurren nukleo zoologikoekin. Animalia abandonatuak edo galduak edukitzen edo kudeatzen dituzten nukleo zoologiko guztiek izan beharko dute gune zoologikoei buruzko apirilaren 11ko 81/2006 Dekretuaren araberrako baimena. Horrez gain, foru-aldundietako agintaritza eskudunek nukleo zoologiko horiek erregistratuko dituzte SITRAN (Animalien Trazabilitaterako Sistema Integrala) datu-baseko REGA (abeltzaintzako ustiatzearen erregistroa) atalean, eta gutxienez izango dute 75 sailkapen-zooteknikoa (Animalia abandonatuak edo galduak jasotzeko zentroak).

Nukleo zoologiko horiek izan daitezke publikoak edo pribatuak. Animaliak babesteko elkarteak edo enpresak badira, animalia abandonatu edo galduak jasotzeko jabeek jakinarazpena bidali beharko diete –baldin badute–, udal bat izenean jarri, hirugarren bati laga edo akabatzeke, Euskal Autonomia Erkidegoan txakurrak edukitzeari buruzko 101/2004 Dekretuaren 9. artikuluaaren arabera, eta hitzarmen edo kontratu bat izan beharko dute zerbitzu horiek emateko. Administrazio Publikoen esku dauden animaliak sakrifikatu ahal izango dira soilik edukitzaile pribatu bat bilatzeko egindako ahalegin guztiak egin ondoren.

2. Mikrotxipa erregistraturik ez duen edo identifikatu gabe dagoen txakur bat, gutxienez, 30 egun eduki beharko da hartuta. Nukleo zoologikora iristen denean, albaitari ofizial edo pribatu gaitu batek mikrotxip bat jarriko dio animaliarri, nukleo zoologikoaren erregistro-liburuan inskribatu eta gune zoologikoei buruzko apirilaren 11ko 81/2006 Dekretuaren 7. artikulua betetzeko.

Aipatutako 30 eguneko epean txakurrarengatik ez badu inork galdetu, erregistratu ondoren, bere sakrifizioa saihesteko ahal den guztia egingo da animalia baimenaren lagapena eginez. Aurretik tramitazio, identifikazio eta jabetza berriaren lagapen gastuak ordainduko dira. Udalak hartzen badu animalia bere gain edo hirugarren bati lagatzen bazaio, mikrotxipa erregistratuko da aipatutako Dekretuaren 2. artikuluko 2. atalaren arabera, eta identifikazio-dokumentu ofiziala jaulkiko zaio. Txakurrek ezingo dute nukleo zoologiko baimenduetatik atera mikrotxip erregistratuarekin eta identifikazio-dokumentu ofizialarekin behar bezala identifikatu gabe. Edozein arrazoiarengatik atxikita dagoen

bitartean animaliak ihes egiten badu edo nukleo zoologikotik lapurtzen badute animalia laga edo jabetzan hartu baino lehen, jaso zen udalerriko udalaren izenean erregistratuko da.

Txakurrak mikrotxip erregistratua badu edo jabea identifikatzeko aukera ematen duen beste identifikazio-markaren bat badu, jabeari jakinaraziko zaio froga eta guzti txakurra jaso edo hartu egin dela, eta jabeak 7 egun baliodun izango ditu txakurra berreskuratzeko; aurrez, txakurra zentro horretan edukitzeak sortu dituen gastuak ordaindu beharko ditu. Hasiera batean, saiatuko dira telefonoz jakinarazten jabeak animalia identifikatzeko erregistro orokorrean adierazitako telefono-zenbakian edo, bestela, dena delako autonomia-erkidegoko txakurren erregistroan adierazitakoan. Lortzen badute jabearekin harremanetan jartzea, txakurra jasotzeko eguna eta ordua finkatuko dituzte, eta nukleo zoologikoaren erregistro-liburuan jasoko da. Ez badute lortzen telefonoz kontaktatzea edo jabeak ez badu animalia jasotzen aurreikusitako egunean eta orduan, jakinaraziko da Administrazio Publikoen Administrazio Prozedura Erkidearen urriaren 1eko 39/2015 Legearen arabera. 7 eguneko epe horretan jabeak ez badu animalia berreskuratu, adierazitako hori egingo zaio txakurrari. Epeak kontatzeko, kontuan izango da Administrazio Publikoen Administrazio Prozedura Erkidearen urriaren 1eko 39/2015 Legearen 30. artikuluan xedatutakoa.

Abandonatutako animalia bat udalak jabetzan hartu, hirugarren bati laga edo hilez gero, Animaliak Identifikatzeko Erregistro Orokorrean erregistratuko da aldaketa hori.

3. Txakur bat abandonatzea arau-hauste oso astuna izango da, Animaliak Babesteko urriaren 29ko 6/1993 Legearen 27.3 b) artikuluan xedatutakoaren arabera.

4. Baldintza bereziek hala gomendatzen badute, udalak aukera izango du jabe ezagunik ez duen animalia baten behin-behineko zaintza emateko animalia zainduko duela eta higiene- eta osasun-baldintza egokietan mantenduko duela berma dezakeen beste pertsona fisiko bati. Animalia laga ahal izateko, pertsona fisiko horrek nahitaez hartu beharko du konpromisoa animalia ongizateari buruzko gertakari oro jakinarazteko ardura duen zentroari, eta animalia berehala itzultzeko titularra agertzen bada edo adoptatzailearen bat aurkitzen bada. Harrera-etxe horien zerrenda eguneratua izango du zentroak, eta udalerriko udalaren, foru-aldundietako agintaritza eskudunaren eta AIEOren esku ipiniko du.

19. artikulua. Animalia hilak jasotzea.

1. Lagun egiteko animalien gorpuzkiak kudeatzeari dagokionez, partikularrek albaitaritza-zerbitzu pribatu bati eskatu beharko diote zerbitzu hori.

2. Errenteriako Udalak sustatuko du zerbitzu bat aktibatzea, izan propioa edo kontratatua, bere herriko kaleetan animalien gorpuzkiak jasotzeko eta ondoren tratatzeko.

3. Animalia hil bat abandonatuta ikusten dutenek Udalari jakinarazi behar diote, baldintza higieniko egokietan jaso dezan gorpuzkia.

4. Debekatuta dago edozein espezieetako animalien gorpuzkiak botatzea etxeko hondakinen artean, edonolako lurretan, hustubidetik botatzea, ibaietara, estolda-zulo edo estoldetara, baita jabetza publikoko lurretan lurperatzea ere.

5. Arau hau ez betetzeagatik, zigorraz gain, arlo sanitarioko araudian aurreikusitako erantzukizunak ere egotzi ahal izango dira.

6. Landaguneetan nekazaritza eta abeltzaintzako ustiapenetako animalia hilak jasotzeko zerbitzua Gipuzkoako Foru Aldundiak ematen du.

20. artikulua. Txakurrak eraso egiten duenean jarraitu beharreko prozedura.

1. Txakur batek pertsona bat eraso izanaren salaketa jaso duen edo horren berri izan duen administrazio-erakundeak eraso egin duen txakurra, haren jabea eta erasoaren gorabeherak identifikatzen lagunduko duen datu oro bilduko du salatzailearengandik edo jakinarazpena egin duenarengandik. Eta berehala jarriko ditu datu horiek administrazio-espeditentiaz arduratuko denaren esku; alegia, txakurra erroldatuta dagoen, eta halakorik ezean, jabea bizi den udalerrria arduratuko da horretaz, eta dokumentazio guztia udalerrri horri helaraziko zaio.

2. Erasotzerakoan hozka egin badu eta horrek lesio bat sortu badu, eskumena duen erakundeak espedientea ireki dela jakinaraziko die osasun-arloan eskumena duen Eusko Jaurlaritzako departamentuari eta Foru-Aldundiko Abere-Osasuneko Zerbitzuei.

Lesioak sortu dituen txakurraren jabeak 24 ordu izango ditu txakurra berak aukeratutako albaitari ofizial edo gaitu batengana eramateko; txakurrak behaketan egon beharko du 14 egunez, baina egun-kopuru hori aldatu ahal izango da unean uneko baldintza epizootologikoen hala gomendatzen badute, eta betiere, txosten tekniko bat ematen bada arrazoiak emanez. Espedientea izapidetzen ari den udalari jakinarazi beharko zaio txakurra behaketan dagoela, gertakaria jazotzen denetik kontatzen hasita 72 orduko epean. Epe horretan jabeak txakurra albaitariarengana eraman ez badu, eskumena duen udal-organoak eskatuko dio eraman dezan, eta txakurra animaliak jasotzen dituen zentro batean sartzeko edo isolatzeko agindu ahal izango du. Animaliak jasotzeko zentroko ostatuaren eta, txosten edo egiaztagiririk ematen bada, horien kostua Udalak ordainduko du eta jabeari ordainak eskatuko dizkio. Txakurrak jabe edo edukitzeaile jakinik ez badu, gertatutakoaren berri duen administrazioa izango da txakurra jaso eta behaketan jartzeko ardura izango duena.

Albaitariak behaketa egingo du zoonosia izateko arriskua dagoen ala ez ikusteko eta animalia izaera arriskutsua izan daitekeen ala ez ebaluatzeko; eta Euskal Autonomia Erkidegoan txakurrak edukitzeari buruzko 101/2004 Dekretuaren 0 eranskinean dagoen ereduari jarraituz, emaitzari buruzko egiaztagiria/

txostena bidali beharko du. Jabeak, behin txakurrari behaketa egin zaionean, 48 ordu izango ditu albaitariaren egiaztagiria bidaltzeko espedientea izapidetzen ari den Udalari -lehen paragrafoan adierazitakoari-, Udal horrek espedientean sar dezan. Udalak, kopia bat igorriko du dagokion Foru-Aldundiko Abeltzaintza-Zerbitzura eta osasun-arloan eskuduna den departamentuko zaintza epidemiologikoaren arduradun den unitatera. Behaketa hori egin ondoren arrisku sanitarioa dagoela ikusten bada, horretan diharduen administrazioak agindua eman dezake txakurra zentro batean sartzeko edo isolatzeko edo, dagoeneko egoera horretan egonez gero, berdin jarraitzeko.

3. Erasotzerakoan hozkadarik egin ez bada, jabeak berak nahi duen albaitari ofizial edo gaitu batengana eraman beharko du txakurra; albaitariak animalia izaera arriskutsua den ala ez ebaluatuko du, eta egiaztagiri bat emango du. Jabeak espedientea izapidetuko duenari bidali beharko dio egiaztagiri hori.

4. Pertsonen eraso egin dieten kasuetan, gertatutakoaren berri izan duen administrazioak animalia erroldatuta dagoen udalerriko udalari jakinaraziko dio, AIEOko animalia fitxan jaso dezan, animalia datuen aldaketa gisa.

5. Beste animalia bati eraso egin dieten kasuen, gertatutakoaren berri izan duen administrazioak animalia erroldatuta dagoen udalerriko udalari jakinaraziko dio, animalia fitxan

jaso dezan. Udal horrek, kontuan izanda erasoaren gorabeherak, eragindako kalteak, beste inoiz gertatu den edo bestelako faktoreak, baloratuko du eraso egin duen animalia behaketan jarri behar duen udalak aukeratutako albaitari ofizial edo gaitu batek, 3. ataleko kasuan bezala.

21. artikulua. Laguntza-txakurrak.

1. Aurreko artikuluetan xedatutakoa gorabehera, laguntza-txakurrekin doazen pertsonak leku, espazio eta garraio publikoetan sartzetik izango dute, Ahalmen Urrituentzako Laguntza Txakurrei buruzko ekainaren 29ko 10/2007 Legean zehaztutako baldintzetan.

2. Eskumena duen agintariak edo erabiltzen ari diren zerbitzuaren arduradunak hala eskatuz gero, dena delako animalia laguntza-txakurra dela eta dagozkion osasun-betebeharrak betetzen dituela egiaztatzen duten agiriak erakutsi beharko dituzte laguntza-txakurrekin doazenean.

3. Itsu-txakurrak gaixotasun- edo oldarkortasun-zantzurik badu, nabarmen zikin badago edo pertsonentzat edo beste animalia batzuentzat arriskutsua izan daitekeela pentsaraz dezakeen beste edozein zantzu ageri badu, bertan behera geratuko da adierazitako lekuetara sartzeko eskubidea.

22. artikulua. Garraio publikoa.

Edozein garraibide publikotan eraman ahal izango dira etxeko animaliak, baldin eta zerbitzu horien araudiek hala baimentzen badute eta bertan finkatutako baldintzak betetzen badira.

Laguntza-txakurrak arazorik gabe eraman ahal izango dira hiriko garraio publikoan, baldin eta txakurraren jabearekin batera badoaz eta ordenantzetan aurreikusitako osasun- eta higiene-neurriak betetzen badituzte.

Garraibidea taxia bada, haren jabeak erabakiko du nola jardun behar den.

23. artikulua. Konpainiako animaliak Europako Erkidegoaren barruan lekuz aldatzea.

Txakur, katu eta hudoen jabeek, edo horiek baimendutako pertsonak, animalia horiek Europako Erkidegoaren barruan lekuz aldatuko badira, Ekonomiaren Garapen eta Lehiakortasuneko sailburuaren 2015eko martxoaren 2ko Aginduan edo hori ordezkatzeko duen araudian arautzen den pasaportearen eraman beharko dute aldean, albaitari ofizial edo gaitu batek emana.

24. artikulua. Txakurren erregimen orokorra.

Ordenantza honetan xedatzen denaz gain, bete beharko da Euskal Autonomia Erkidegoan txakurrak edukitzeari buruzko ekainaren 1eko 101/2004 Dekretuan, Arriskutsuak izan daitezkeen animaliak edukitzearen inguruko erregimen juridikoari buruzko abenduaren 23ko 50/1999 Legea garatzen duen martxoaren 22ko 287/2002 Errege Dekretuan (2007ko abenduaren 13ko berrikuspena) eta aplikagarri diren gainerako arauetan xedatutakoa ere.

II. KAPITULUA. -ARRISKUTSUAK IZAN DAITEZKEEN ANIMALIEI BURUZKO BERARIAZKO XEDAPENAK

25. artikulua. Erregimen orokorra.

Arriskutsuak izan daitezkeen animaliak edukitzearen inguruko erregimen juridikoari buruzko abenduaren 23ko 50/1999 Legean, hori garatzen duen martxoaren 22ko 287/2002 Errege Dekretuan, Euskal Autonomia Erkidegoan txakurrak edukitzeari buruzko ekainaren 1eko 101/2004

Dekretuan eta aplikagarri diren gainerako arauetan xedatutakoa aplikatuko zaie Ordenantza honen 3. artikuluan definitu diren animaliei, hau da, arriskutsuak izan daitezkeen animaliei.

26. artikulua. *Lizentzia.*

1. Arriskutsuak izan daitezkeen animaliak edukitzearen inguruko erregimen juridikoari buruzko abenduaren 23ko 50/1999 Legearen arabera arriskutsuak izan daitezkeen animaliatzat jo beharra dagoen edozein animalia edukitzekotan, administrazio-lizentzia eskuratu beharko da aldeaz aurretik. Hain zuzen ere, eskatzailea bizi den udalerriko Udalak emango du lizentzia hori, edo, bestela, hura jakinaren gainean jarri ondoren, salerosketa edo txakurraren trebakuntza egin den udalerrikoak, egiaztatu ondoren jabeak gutxienez betetzen dituela betebeharrak hauek:

a) Adinez nagusia izatea.

b) Ez kondenatu izana giza hilketak, lesio, tortura, askatasunaren edo osotasun moralaren, sexu-askatasunaren eta osasun publikoaren aurkako delituengatik, banda armatua edo narkotrafikoan aritzeagatik, eta ebazpen judizial bidez ez kendu izana arriskutsuak izan daitezkeen animaliak edukitzeko eskubidea.

c) Arau-hauste larri edo oso larriren baten ondorioz ez jarri izana Arriskutsuak izan daitezkeen animaliak edukitzearen inguruko erregimen juridikoari buruzko abenduaren 23ko 50/1999 Legearen 13. artikuluan 3. atalean adierazitako zigor osagarriaren bat. Nolanahi ere, lizentzia aldi baterako kendu izanak ez du galaraziko hura berriro eskuratzea edo berritzea, baldin eta horretarako eskabidea egiten denerako osorik bete bada lehendik jarritako zigor hori.

d) Arriskutsuak izan daitezkeen animaliak eduki ahal izateko beharrezko ahalmen fisikoa eta gaitasun psikologikoa edukitzea.

e) Egiaztatzea formalizatu duela hirugarrenei egin lekizkiekeen kalteei aurre egiteko erantzukizun zibileko aseguruak –gutxienez ehun eta hogeita mila euroko estaldura (120.000 euro)–. Hain zuzen ere, animalia identifikatu ondorengo hamar egunetan kontratatu beharko da aseguru hori, 101/2004 Dekretuaren 12. eta 13.3.e) artikuluetan ezarritakoaren arabera.

f) Aseguru hori beste aseguruaren baten baitakoa izan ahalko da, baina, Nolanahi ere, kontratatu dela egiaztatu beharko da 101/2004 Dekretuaren III. eranskinean ageri den ereduari jarraiki aseguru-konpainiak emandako ziurtagiriaren bitartez. Ziurtagiri horretan berriaz adierazi beharko da, batetik, aseguruak bere gain hartzen duen txakurraren identifikazioa eta, bestetik, aseguruak noiztik noiz arte egongo den indarrean.

g) Txakurraren titularraren erantzukizuna izango da hura bizitza osoan erantzukizun zibileko aseguru baten bitartez aseguraturuta edukitzea; hartara, behar den guztietan berriro beharko du aseguru hori.

Lehen atal honetako b) eta c) paragrafoetan adierazitako betebeharrak betetzen direla egiaztatuko da halakoei dagozkien erregistroek emandako ezezko egiaztagiriekin. Ahalmen fisikoa eta gaitasun psikologikoa egiaztatzeko, berriz, gorago aipatutako martxoaren 22ko 287/2002 Errege Dekretuan xedatutakoaren arabera eskuratutako ziurtagiriak aurkeztu beharko dira.

2. Interesdunak eskabidea egin ondoren, eskumena duen udal-organismoak eman edo berriro du administrazio-lizentzia, 50/1999 Legearen xedatutakoaren arabera, aurreko atalean finkatutako betebeharrak betetzen direla egiaztatu ondoren.

3. Bost urteko indarraldia izango du lizentziak; ondoren, beste horrenbesteko berriro ahal izango da, aldiro. Alabaina, lizentzia emateko baldintzak ez betetzea nahikoa arrazoi izango da

hura bertan behera uzteko. Lizentzian ageri diren datuetako edozein aldatzen bada, udal albaitaritzaz-zerbitzuei jakinarazi beharko die titularrak, aldaketa gertatu ondorengo hamabost egunetan, lizentzian aldaketa egin dezaten.

4. Indarrean dagoen lizentziaren gaineko kautelazko neurria hartu edo hura bertan behera uzten bada, auzi-bidean nahiz administrazio-bidean, ez zaio besterik emango edo lehengoa berrituko indargabetzeak bere horretan dirauen bitartean.

5. Lizentzia ematen bada artikuluan honen 1. paragrafoan ezarritako betebeharrak bete gabe, lizentzia baliogabea izango da eta, ondorioz, ulertuko da titularrak ez duela lizentziarik.

27. artikulua. Arriskutsuak izan daitezkeen animalien erregistroa.

1. Arriskutsuak izan daitezkeen txakurren jabeek, lizentzia badute, txakur horiek inskribatu beharko dituzte txakurra erroldatuta dagoen herriko Arriskutsuak izan daitezkeen animalien udal-erregistroan udal-erregistroari guztiek izan beharko dute, lizentzia eskuratzen dutenetik kontatzen hasita 15 eguneko epean. Erregistro horretan inskribatzeko, arriskutsuak izan daitezkeen txakurren jabeek aurkeztu beharko dituzte hirugarrenei eragindako kalteak estaltzeko erantzukizuneko aseguruaren ziurtagiria aseguruak izan beharko du Euskal Autonomia Erkidegoan txakurrak edukitzeari buruzko 101/2004 Dekretuaren 12. artikuluan ezarritakoaren arabera eta animalia AIEOn inskribatzeko eskaeraren kopia.

2. Arriskutsuak izan daitezkeen animalien udal-erregistroari jakinarazi beharko zaio animalia saldu, eskuz aldatu, dohaintzan eman, lapurtu, hil edo galduz gero, eta hala jasoko da dagokion erregistro-orrian.

3. Arriskutsua izan daitekeen animalia bat, betiko nahiz hiru hilabetetik gorako aldi baterako, Euskal Autonomia Erkidegotik kanpoko udal-erregistroari batera eramaten badu, egoki diren udal-erregistroetan inskripzioak egiteko obligazioa izango du jabeak.

4. Animalien titularrak artikuluan honetan araututakoa betetzen ez badu, dagokion administrazio-zigorra jarriko zaio, 50/1999 Legearen 13. artikuluan xedatutakoaren ildotik.

28. artikulua. Segurtasun-neurriak.

1. Arriskutsuak izan daitezkeen arrazetako txakurrak hazten dituztenek, baita arriskutsuak izan daitezkeen animalien jabe eta edukitzaileek ere, indarrean dagoen legedian finkatuta dauden herritarren segurtasunaren alorreko arau oro betetzeko obligazioa izango dute, animalia horien eta gizakien arteko bizikidetzaren alaitasuna izan dadin, eta herritarrei enbarazurik egin ez diezaieten.

2. Arriskutsua izan daitekeen animalien bat leku edo espazio publikoetan edukitzeko, berekin daraman eta kontrolatzen duen pertsonak ordenantza honen 26. artikuluan adierazi den administrazio-lizentzia eraman beharko du aldean, baita Animalia dagokion Udal-Erregistroan inskribatuta dagoela egiaztatzen duen agiria ere.

3. Arriskutsuak izan daitezkeen animaliek, etxalde, baserri, landetxe, txalet, lur-sail, terraza eta patioetan nahiz beste edozein leku mugatuta daudenean, lotuta egon beharko dute; salbuespena izango da eremu horietara sartzen edo hurbiltzen diren pertsonak edo animaliak babesteko moduko espazio bat izatea, azalera, altuera eta itxitura egokiarekin.

4. Arriskutsuak izan daitezkeen animalien hazle, trebatzaile eta saltzaileek txakur horiek edukitzeko instalazio eta bitarteko egokiak izan beharko dituzte.

5. Arriskutsua izan daitekeen animalia lapurtu edo galduz gero, Arriskutsuak izan daitezkeen animalien udal-erregistroaren arduradunari jakinarazi beharko dio titularrak, gertaeren berri izan ondorengo berrogeita zortzi orduetan.

6. Udal-agintaritzak kautelaz esku hartuko du eta aurreikusitako harrera-zentrora eramango du arriskutsua izan daitekeen edozein zakur, jabeak ez baditu betetzen ordenantza honetan adierazitako neurriak. Gainera, egoki diren zigor ekonomikoak jarri ahal izango ditu.

29. artikulua. Salbuespenak.

Egoeragatik komeni bada, zenbait betebeharrak betetzetik salbuetsi ahal izango dira animalien jabe eta edukitzaileak, kasu hauetan:

- a) Animalia horiek funtzio sozial batekin erabiltzen dituzten erakunde publiko edo pribatuak izatea.
- b) Ganadua zaindu, babestu eta gobernatzeko txakurrak erabiltzen dituzten nekazaritza- eta abeltzaintza-ustiategiak, baita ehiza-jarduerak ere, nahiz eta ezingo duten inolaz ere 50/1999 Legean jasota dauden legez kontrako jardueretan jardun.
- c) Lan- eta kirol-probetan parte hartuko duten animaliak aukeratzeko saioak, eskumena duen agintariak baimendu eta ikuskatzen baditu –borroka- eta eraso ariketak izan ezik–, eta indarrean dagoen araudian eta ordenantza honetan xedatutakoaren arabera.

30. artikulua. Garraioa.

Animalien ongizateari buruzko berriarazko araudiari jarraiki garraiatu beharko dira arriskutsuak izan daitezkeen animaliak, eta garraioak dirauen bitartean nahiz itxaronaldietan eta zamalanetan, pertsonen, ondasunen eta bestelako animalien segurtasuna bermatzeko hartu beharreko arreta-neurriak hartu beharko dira.

V. TITULUA

ANIMALIEKIN ZERIKUSIA DUTEN JARDUERAK

I. KAPITULUA. GUNE ZOOLOGIKOAK

31. artikulua. Erregimen orokorra.

1. Euskal Autonomia Erkidegoko Gune Zoologikoei buruzko apirilaren 11ko 81/2006 Dekretuan edo hori ordezkatzeko duen araudian xedatutakoak arautuko ditu gune zoologikoak.
2. Gune zoologiko ibiltarien eta animalia-erakusketa eta -lehiaketan kasuan, baita animaliek parte hartzen duten euskal herri-kirolen erakustaldien kasuan ere, udal-lizentzia edo -baimena eskuratu beharko da, baita indarrean dagoen legediaren arabera foru-aldundiak nahiz autonomia erkidegoak eman beharreko baimenak ere.

32. artikulua. Albaitaritza-zentroak eta animaliak merkaturatzeko establezimenduak.

1. Udalaren lizentzia eta aurrekomunikazioa izan beharko dituzte, egoki bada, indarreko Hirigintza-arauetan xedatutakoaren arabera, jarduera hauek:
 - a) Etxeetan bizitzeko, ehizarako edo zientziako erabilerarako animaliak ugaltzeko, aldi baterako edo betirako hartu edo hornitzeko zentroak.
 - b) Animaliak egoteko eta zaintzeko kontsulta, klinika, albaitaritza-klinika eta hotelak edo bestelako establezimenduak.

c) Animalien aldi baterako erakusketak edo erakusketa iraunkorrak.

2. Kontsulta klinikoetan eta tratamendu sanitarioak edo bestelakoak animaliei ibiltari gisa aplikatzen dizkieten establezimenduak sailkatuko dira albaitaritzako kontsulta, albaitaritzako klinika eta albaitaritza-ospitale gisa.

a) Albaitaritza-kontsulta: lokal hauek izango dituzte, gutxienez, harrera-aretoa eta kontsultarako eta sendaketako eta kirurgiako interbentzio txikietarako gela bat.

b) Albaitaritza-klinika: lokal hauek izango dituzte, gutxienez, itxarongela, kontsulta-gela, interbentzio kirurgikoetarako gela, instalazio erradiologikoa, laborategia eta bizkortzeko aukerak.

c) Albaitaritza-ospitalea: albaitaritza-klinikarako ezarritakoez gain, egunean 24 orduko zaintza sanitarioa eta ospitaleratutako animalien etengabeko arreta duen ospitaleratze-gela izango du.

3. Animaliak saltzeko eta zaintzeko denda orok gune zoologikoen foru-erregistroan inskribatuta egon beharko du. Horrez gain, ekipamendu eta instalazio horiek beteko dituzte sektorea arautzen duten arauak, besteak beste, hauek:

a) Animaliek beren bizitokietan erosotasun-baldintza egokiak dituztela bermatu beharko dute beti ere instalazio eta ekipoei. Halaber, ariketa fisikoa egiteko aukera eman beharko zaie animaliei, egunero.

b) Zoruak izango dira iragazgaitzak, iraunkorrak eta garbigarriak.

c) Paramento bertikalak alikatatuta egongo dira gutxienez zorutik 1,75 m arte; kontserbatu, garbitu eta desinfektatzeko aukera ematen duten materialetakoak izango dira gainerakoa eta sabaiak.

d) Horma eta sabaien arteko loturak izango dira profil konkabokoak.

e) Izango dituzte edateko ura, ur hotza eta ur beroa (gutxienez 80° C-tan).

f) Aireztapen-sistema eduki beharko dute, dela naturala, dela artifiziala, aretoa behar bezala aireztatzeko.

g) Instalazioak eta materialak garbitzeko, desinfektatzeko eta intsektuak eta arratoiak hiltzeko programa bat eduki beharko da, aditu batek gainbegiratua. Edonola ere, gutxienez urtean behin desinfektatu eta desintsektatu beharko du enpresa ofizial baimendu batek.

h) Hondakin organikoak, zaintzako materiala eta hondakin patologikoak ezabatuko dira ontzi itxi eta estankoei.

i) Intsonorizazio egokia, establezimenduan zer motatako animaliak edukiko diren aintzat hartuta, zarata eta dardarei buruzko udal-ordenantzan xedatutakoaren ildotik.

j) Animaliak dendaren sarreratik gutxienez metro bateko tartera egon beharko dute, enbarazurik ezin jasateko inguruetan, eta bide publikotik edo merkataritza-establezimendu kolektiboaren barne-galerietatik ezin ikusteko modukoetan.

II. KAPITULUA. LURZORU PUBLIKOKO JARDUERAK

33. artikulua. Ehiza-jarduerak.

Animaliei tratu txarrak ematea saihesteko eta animalien bizitzarako eskubidea zaintzeko, Errenteriako Udalak:

1. Lurzoru ez-urbanizagarriko lurren jabe denez, ez du baimenduko ehiza-lerro, -postu eta -abata berririk jartzetik Udalaren lurretan; gainera, lagundu beharko du esparru horietan daudenak murrizten, bateraezinak badira hain agresiboak edo arriskutsuak ez diren beste jarduera batzuekin (mendi-ibiliak egitea, hezkuntza...). Egun badaudenak mantendu ahal izango dira, betetzen badituzte indarreko arauetan ezarritako segurtasun-distantziak eta ez badiote eragiten herritarren segurtasunari.

2. Ez du antolatuko edo baimenduko ehiza-lehiaketarik, usakume-tiraketarik edo antzeko ehiza-jarduerarik, ez zoru publikoan ez herriko eremu babestuetan: Lau Haizeta Parkea eta Natura 2000 Sarea (Aiako Harria Parke Naturala eta Kontserbazio Bereziko Eremua-KBE).

3. Ez du baimenik emango ehiza-lehiaketak egiteko Gipuzkoako Foru Aldundiak ezarritako urteko ehiza-lehiaketatik kanpo, Gipuzkoako Foru Aldundiaren arauak besterik xedatzen ez badu.

4. Ez du diruz lagunduko edo udal-programazioetan sartuko ehizaren edo hiltzen duen arrantzaren inguruko ekitaldirik.

34. artikulua. Zirkuak eta antzekoak.

1978ko Animalien Eskubideen Aldarrikapen Unibertsalean (4. artikulua: a) Espezie basati bateko animal orok du eskubidea naturako, lurreko, aireko edo uretako bere ingurunean aske bizitzeko eta ugaltzeko; b) Askatasun-gabetze oro, bai eta hezkuntza-helburuak dituztenak ere, eskubide horren aurkakoa da; 10. artikulua: a) Ezein animalia ez da esplotatu behar gizakiaren aisiarako; b) animalien erakusketak eta animaliak baliatzen dituzten ikuskizunak bateraezinak dira animalia-aren duintasunarekin) eta Animaliak babesteko urriaren 29ko 6/1993 Legearen 4. artikuluan xedatutakoaren arabera, animaliadun zirkurik gabeko herria da Errenteria, ordenantza honen 9. artikulua (21) eta 22) ataletan xedatutakoaren ildoan.

35. artikulua. Bestelako jarduerak.

1. Udalak ez du diruz lagunduko edo ez du baimenik emango jaietako edo kultura-ekitaldietako udal-programazio publikoetan honelako jarduerak edo antzekoak sartzeko: zezen-ekitaldiak, usotiroketa edo bestelako espezieena, hiltzen duten ehiza eta arrantza lehiaketak, idi, ahari edo bestelako demak, etab.

2. Lehen sektorea sustatu eta ezagutarazteko erakusketa eta azoketan bermatuko da jendarean jarritako animaliei ez zaiela tratu txarrak ematen jarduerak irauten duen bitartean, eta elikagai eta espazio nahikoa badutela.

III. KAPITULUA. TXAKUR-PARKEAK

36. artikulua. Definizioa.

1. Xedea eta definizioa. Kapitulu honen xedea da arautzea txakurrentzako eremuak erabiltzeko baldintzak. Honela definitzen dira eremu horiek:

Txakurrentzako eremuak edo txakur-parkeak: txakurren aisialdirako eremua, betiere jabeek edo laguntzaileek gainbegiratuta eta haien kontrolpean, txakurrek aske gozatu, korri egin eta jolasteko

aukera izan dezaten, arriskurik gabe. Horrez gain, sustatzen dira herritarren eta maskoten arteko bizikidetzak eta etxeko animaliak arduraz zaintzea.

Txakurrentzako eremuak bi motatakoak izango dira: itxiak edo irekiak. Itxiak perimetroa mugatua edo hesitua izango dute, eta irekiak, berriz, eremu irekietan egongo dira eta bizikidetzarako espazioak izango dira.

Herriko txakurrentzako eremuen titularra Erreterriko Udala izango da, eta bera arduratuko da Kudeaketaz ere; arautuko dira arloko xedapen orokorretan eta erregelamenduetan ezarritakoaren arabera.

2. Txakurrentzako eremuen egutegia eta ordutegia. Txakurrentzako eremuak beti irekita egongo dira jendearentzako eta maskotentzat, egunean hogeita lau orduetan, asteko egun guztietan, eta baldintza horiek aldatu ahal izango dira egoeragatik hala komeni denean.

Zenbaitetan, txakurrentzako eremu itxietan ezarri ahal izango da jendea eta maskotak ezin sartu ahal izateko baldintza, eremua hobetu, mantendu edo garbitzeko edo egoki den bestelako edozein lan burutzeko.

37. artikulua. Txakurrentzako eremuak erabiltzeko nahitaez bete beharreko arauak.

1. Nahitaez bete beharreko arau hauek ezartzen dira:

a) Txakurrentzako eremu itxiak soilik erabil ditzakete txakurrek eta haiekin doazenek.

b) Debekatua dago animaliak sartzea arantzak, hortzak edo sistema elektrikoa duten lepokoekin edo bestelako sistema arriskutsuekin. Gomendioa da beroan dauden emeak ez eramatea; dena dela, erabaki hori hartu beharko du animalia arduradun den pertsonak bere erantzukizunpean.

c) Animaliek uneoro egon behar dute jabearekin edo eraman duen pertsonarekin, eta pertsona hori arduratuko da animalia zaintzeaz eta maskotaren ondorioz egin beharreko jarduerak burutzeaz. Txakurra etengabe jagon behar denez, debekatua dago eremuan bakarrik uztea.

d) Nahitaezkoa da maskoten gorozkiak jasotzea eta horretarako jarritako zakarrontzietara botatzea. Horretarako, jabeek beti eskura izango dituzte beharrezko bitartekoak (poltsak,...).

e) Txakurrentzako eremu itxietako ateak beti itxita egongo dira.

f) Animaliak eremuan sartu eta atera beharko dira uhalarekin lotuta eta, eremu itxietan, ez dira askatuko atea itxi arte. Eremu itxietan uhalarekin lotuko dira irteteko atea zabaltzeko aurretik.

g) Animaliek lepokoa edo arnesa izan behar dute beti, borrokaren bat gertatuz gero errazago bereizteko. Prebentzio gisa, saihestuko da parkeetara eramatea txakurrak, aurreikusten bada desegoki edo erasokor jardungo direla (eraso egitea, gehiegi zaunka egitea...). Horrela jarduten badira behin eta berriz, arduradunak lasaitu beharko ditu, edo eremu edo parke horretatik atera.

h) Arriskutsuak izan daitezkeen maskotak. Txakurrentzako parke itxietan muturrekoarekin sartu beharko dute, eta halaxe egon; eremu irekietan, muturrekoa soinean izateaz gain, uhalarekin lotuta egon beharko dute, betiere ez badute hezitzaile baimenduak jaulkitako sozializazio ziurtagiririk. Animalia horiek adinez nagusiak diren pertsonak zaindu beharko dituzte eremu barruan ere.

i) Animalia bat erasokor ageri bada, arduradunak berehala atera behar du eremutik.

j) Hamalau urtez beherako pertsonak txakurrentzako eremuetan sartu ahal izango dira arduradun batekin badoaz.

k) Debekatua dago txakurrentzako parke itxietan maskotak bainatzea edo apaintzea.

l) Animalien jabeak dira horiek eragin dezaketen edozein kalteren legezko erantzule, eta Udala erantzukizun horretatik salbuetsita geratzen da; kalte horien berri eman beharko da beti (zuloak egitea...) eta arreta berezia jarri beharko da txakurrentzako eremu itxietan.

m) Maskoten arduradunek haiekin interaktuatu ahal izango dute, baina haiek edo beste animalia bat urduritu gabe. Urduritzen ari badira, egiten ari dena egiteari utziko dio arduradunak.

n) Eraso-zantzuren bat antzematen bada, jabeak uhaletik helduko dio eta txakurrentzako eremu itxitik atera beharko du, animalia lasaitzen den arte.

o) Txakurrak nahi den denboran eduki ahal izango dira barrutian, betiere ordutegia mugatua ez bada edo ez badira beste maskota edo pertsona batzuekin gatazkak sortzen.

p) Debekatua dago txakurrentzako eremu itxietan jatea edo edatea.

q) Debekatua dago animaliei jaten ematea txakurrentzako eremu itxietan.

r) Animalia ingurunera ohitzen den arte edo bestela ere beharrezkoa bada, ez da txakurra askatuko eremura iritsi bezain laster. Harekin paseo txiki bat emanez gero askatu baino lehen, taldean eta inguruan errazago integratuko da.

s) Eremu bakoitzerako komenigarria den gehieneko maskota-kopurua ezarriko da eremu itxi bakoitzaren ezaugarrien eta neurrien arabera, eta gomendioa da pertsonako baimendutako animalia-kopurua ez gainditzea bi edo hiru unitate baino gehiagoan.

2. Jabeak edo animaliekin doazen pertsonak behartuta daude txakurrentzako eremuak erabiltzeko arauak errespetatzera, eta haiek izango dira gerta daitekeen edozein kalteren legezko erantzule. Halaber, bete beharko dute etxeko animaliak babestearen eta arriskutsuak izan daitezkeen animaliak edukitzearen inguruko indarreko araudia ere.

3. Hasiera batean, Udalak txakurrentzako zazpi eremu hauek sortu ditu: Lartzabal, Beraun, Erdigunea, Alaberga, Kaputxinoak, Esnabide eta Arramendi.

VI. TITULUA

ZIGORTZEKO ERREGIMENA

I. KAPITULUA. XEDAPEN OROKORRAK

38. artikulua. Ikuskapena eta kontrola.

1. Ordenantza honetan arautzen diren gaien ikuskapena eta kontrola Udaltzaingoak, udal zerbitzu teknikoek nahiz beste funtzionario batzuek egin ahal izango dituzte. Horiek guztiak agintaritzaren agentetzat joko dira, eta akta egin edo salaketa-orria bete ahal izango dute; halakoetan, interesdunari jakinaraziko diote eta eskumena duen organoari bidaliko, behar diren neurriak har ditzan eta, bidezko bada, prozedura zigortzailea abiaraz dezan.

2. Arau-haustek delitu edo hutsegite izan daitezkeela irizten badio, dossier zigortzailea bideratzeko eskumena duen administrazio-organok gertakarien berri emango dio jurisdikzio penalari, eta ez du prozedura zigortzailearekin aurrera jarraituko harik eta epailearen ebazpena

irmoa izan arte. Bitartean etenda geratuko da preskripzio-epea.

39. artikulua. *Arau-haustea eta zigorrak.*

1. Animaliak Babesteko urriaren 29ko 6/1993 Legean, Arriskutsuak izan daitezkeen Animaliak Edukitzearen inguruko Erregimen Juridikoari buruzko abenduaren 23ko 50/1999 Legean, Euskadiko Antolamendu Sanitarioaren ekainaren 26ko 8/1997 Legean eta horiek garatzeko arauetan, Etxeko eta Merkataritzako Hondakinei buruzko Udal Ordenantza eta ordenantza honetan halakotzat tipifikatutako ekintzak eta ez egiteak administrazio arau-haustetzat joko dira, 7/1985 Legearen XI. tituluan xedatutakoaren ildotik.

2. Ordenantza honetan aurreikusten den zigortzeko ahalmena baliatzekotan, lehenik eta behin administrazio-dosierra abiarazi eta bideratu beharko da, titulu honetan eta administrazioaren prozedura zigortzailea arautzen duten lege eta araudietan xedatutakoaren ildotik.

3. Egileak baino ez dira izango arau-hausteen erantzule, eta egile izango dira hurrengo araudietan zehazten diren baldintzak betetzen dituztenak: Euskal Autonomia Erkidegoko Herri Administrazioen Zigortzeko Ahalmenari buruzko otsailaren 20ko 2/1998 Legean, Administrazio Prozedura Erkidearen urriaren 1eko 39/2015 Legean, eta Sektore Publikoko Erregimen Juridikoaren urriaren 1eko 40/2015 Legean.

1. ATALA. Arauak haustea

40. artikulua. *Arau-haustea.*

1. Arau-hauste arinak:

a) Animaliak identifikatuta eta erroldatuta izateko obligazioa ez betetzea.

b) Animalia askeak propio horretarako ez diren lekuetan edukitzea.

c) Neurri egokiak ez hartzea animaliei ez sartzeko hurreko jostatzeko lekuetan edo propio animalientzat baimendu gabeko beste batzuetan.

d) Animaliak modu iraunkorrean edukitzea terraza, balkoi, lorategi, etxabe, pabiloi, trasteleku, ganbara edo beste edonolako lokaletan, bizileku egokirik gabe, bizilagunei enbarazu nabariak eragiteko moduan edo behar bezala zaindu gabe.

e) Animaliei jaten ematea, horrek enbarazuak, kalteak edo osasungaitasun guneak sorbaditzake.

f) Eraikin eta orubeen jabeek ez hartzea neurririk animalia basatuak edo basatu daitezkeenak ugal ez daitezen.

g) AIEOri ez ematea txakurren errolda-identifikazioaren edo errolda-identifikazioan izandako aldaketan berri eta, hartara, ez betetzea Euskal Autonomia Erkidegoan Txakurrak Edukitzeari buruzko ekainaren 1eko 101/2004 dekretuaren 3. artikuluan jasotako betebeharra.

h) Hiriko bide eta espazio publikoetan txakurrak kontrolik gabe uztea eta animaliar dagokion kate edo uhalik gabe eramatea, betiere ordenantza honetan bertan aurreikusitako salbuespenekin. Kate edo uhalak izan beharko du animalia ezaugarrien arabera eta, gehienez ere, bi metro luzekoa.

- i) Txakur-parkeetan txakurrak bakarrik uztea edo behar den bezala ez jagotea.
- j) Kalean ez jasotzea animalien gorozkiak.
- k) Animaliei tratu laidoztagarria ematea edo beren izaerari ez dagozkion portaera edo jarreretara behartzea.
- l) Urratzea ordenantza honetan araututako betebeharrak eta debekuak nahiz bestelako lege- eta arau-xedapenak, beren izaeratik bestelako kalifikazioa merezi dutenak izan ezik.

2. Arau-hauste larriak:

- a) Animaliak ibilgailu barruan denbora luzez edukitzea.
- b) Animaliak elkarren aurka edo pertsona edo ibilgailuen aurka oldar daitezen zirikatzea, bai eta oldarkortasun-erakuskerian aritu daitezen ere.
- c) Animaliak zaintza, defentsa eta erasorako trebatzea leku publikoan.
- d) Uko egitea udal-zerbitzuei informazioa eta agiriak uzteari edo laguntza emateari, baita okerreko informazio edo agiriak ematea ere.
- e) Animaliak edukitzea behar bezala elikatu gabe edo higiene- eta osasun-baldintza egokirik ez duten instalazioetan.
- f) Animaliak antzutu, mutilatu edo akabatzea, albaitariaren kontrolik gabe edo legeetan ezarritako baldintza eta betekizunak bete gabe.
- g) Txertoak ez jartzea edo nahitaezkoak diren tratamenduak ez ematea.
- h) Animaliak baimenik gabe saltzea.
- i) Animaliei tratu txarra ematea edo jotzea, eta hartara alferreko sufrimendua, zauriak edo mutilazioak eragitea.
- j) Animaliei, zuzenean edo janarien bitartez, sufrimendua edo alferreko kalteak eragin liezazkieketen substantziak ematea.
- k) Kalteak eragin ditzaketan animaliak zaindu eta gordetzeko nahikoa ardurarik ez izatea.
- l) Ageriko gaitz edo oinaze larriak dituzten animaliei albaitaritza-laguntza egokirik ez ematea.
- m) Animaliei administrazio-baimenik ez duten ikuskizunetan parte harraraztea.
- n) Arriskutsua izan daitekeen animalia aske uztea, edo ihes egitea edo galtzea saihesteko beharrezko neurriak ez hartu izana.
- o) Ez betetzea arriskutsua izan daitekeen animalia identifikatzeko betebeharra.
- p) Arriskutsua izan daitekeen animalia bat leku publikoetan egotea muturrekorik gabe edo katerik edo luzagarria ez den uhalik gabe.
- q) Arriskutsua izan daitekeen animalia erregistroan ez inskribatu izana.
- r) Arriskutsuak izan daitezkeen animaliak garraiatzea pertsonen, ondasunen eta beste animalien segurtasuna bermatzeko egoki diren prekauzio-neurririk gabe eta hala egotea zamalanetako

denboran ere.

s) Ez ematea edo ez eman nahi izatea agintari eskudunek edo agenteek arriskutsuak izan daitezkeen animaliei buruzko araudian ezarritako funtzioak betetzeko eskatutako informazioa, eta animalia horiei buruzko informazio okerra edo dokumentazio faltsua ematea.

t) Ez betetzea edukitzeko baldintza bereziak eskatzen dituen zakur baten inguruan ezarritako baldintza bereziak.

3. Arau-hauste oso larriak:

a) Animalien arteko borrokak, eta animaliei heriotza, lesioak edo sufrimendua eragin diezazkieketen beste ikuskizun legez arautu gabeak antolatzea eta burutzea.

b) Animaliak akabatzea eraso-ekintzak edo substantzia toxikoak baliatuta.

c) Konpainiako edo etxeko animalia abandonatzea.

d) Krudeltasuna, tratu txarra edo sufrimendua erakusten duten irudiak filmatzea animaliekin simulaziorik gabe, zinemarako edo telebistarako.

e) Arraza arriskutsuetako txakurrak haztea edo gurutzatzea.

f) Bide eta leku publikoetan janari pozoituak uztea.

g) Arriskutsuak izan daitezkeen animaliak trebatzea gaitasun-ziurtagiririk ez duen norbaitek.

h) Arriskutsuak izan daitezkeen animaliak paseatzea lizentziarik ez duen norbaitek leku edo espazio publikoetan.

i) Arriskutsua izan daitekeen animalia bat saltzea edo eskualdatzea lizentziarik ez duen norbaiti.

j) Animaliak trebatzea oldarkortasuna aktibatzeke edo debekatutako helburuetarako.

k) Klean abandonatzea arriskutsua izan daitekeen animalia bat, edozein espezieetako edo edozein txakur; animalia abandonatua izango da behar bezala identifikatuta doana nahiz jatorriari buruzko identifikaziorik ez daramana, betiere ez badao norbaitekin.

l) Arriskutsuak izan daitezkeen animalien lehiaketa, ariketa, erakustaldi edo ikuskizunak antolatzea eta burutzea, edo horietan parte hartzea, ekitaldi horien helburua bada animalien oldarkortasuna erakustea.

Aurrekoa gorabehera, goragoko arau-maila duen legedian jasotzen direnak gailenduko dira zigortu daitezkeen arau-hausteei dagokienez, eta Ordenantza honek bere baitan hartuko ditu animaliak babesteari eta txakur arriskutsuei buruzko araudietan gerora egiten diren eguneratzeak ere.

41. artikulua. Zigorrak.

Isun hauekin zigortuko dira aurreko artikuluan tipifikatutako arau-haustek:

— Arau-hauste oso larriak: 3.000 eurora arte.

— Arau-hauste larriak: 1.500 eurora arte.

— Arau-hauste arinak: 750 eurora arte.

Alabaina, n), o), p), q), r) eta s) ataletan tipifikatutako arau-hauste astunak zigortuko dira 300,52 eurotik 2.404,05 euro arteko isunekin, eta h), i), j), k) eta l) ataletan tipifikatutako arau-hauste oso astunak zigortuko dira 2.404,06 eurotik 15.025,30 euro arteko isunekin.

Bestalde, t) atalean tipifikatutako arau-hauste astuna zigortuko da 300,52 eurotik 1.502,53 euro arteko isunarekin.

42. artikulua. Zigortzeko eskumena.

Alkatetzak edo bera eskuordetzen duen organoak izango du zigorrak jartzeko eskumena.

Udaltzainek gaitasuna izango dute ziurtatzeko ordenantza hau betetzen dela, eta txostenak egin beharko dituzte ikusten dituzten edo jakinarazten dizkieten egintzen inguruan eta beste zerbitzu batzuei behar duten laguntza eman.

II. KAPITULUA. ZIGORTZEKO PROZEDURA

43. artikulua. Prozedura.

1. Titulu honetan zehaztutako arau-hausteei dagokienez, zigortzeko prozedura izango da Administrazio Prozedura Erkidearen urriaren 1eko 39/2015 Legean eta Sektore Publikoko Erregimen Juridikoaren urriaren 1eko 40/2015 Legean jasotako zigortzeko ahalmenaren inguruko printzipioen arabera, eta, aurreko ataletan adierazitako xedapenetako bakoitzaren arau-jatorriaren arabera, aplikatuko da Euskal Autonomia Erkidegoko Administrazio Publikoen Zigortzeko Ahalmenari buruzko otsailaren 20ko 2/1998 Legea.

2. Isunen zenbatekoak mailakatzeko, baldintza hauek izango dira kontuan:

- a) Arau-haustearen garrantzi sozial eta sanitarioa, eta eragindako kaltea.
- b) Arau-haustea egitea irabazia lortzeko asmoarekin eta lortutako etekinaren zenbatekoa.
- c) Izaera bereko arau-hauste bat baino gehiago egitea urtebeteko epean, bide administratiboko ebazpenez hala izapidetu denean.
- d) Arau-haustea arindu edo larritzea eragin dezakeen beste edozein. Horretarako, garrantzi berezia izango du animaliangan indarkeria egitea haurren edo desgaituen aurrean.

3. Ahal bada, aplikatuko dira zuzenbidearen aurkakotasunetik eta erruduntasunetik kanpo uzteari buruzko zigor-arauak, betiere dena delako sektore administratiboaren berezitasunen arabera beharrezkoak diren ñabardura eta egokitzapenekin. Hala ere, ondorio horietarako, sektore horretan garrantzitsuak diren beste egoera batzuk ere hartu ahal izango dira kontuan.

44. artikulua. Auzibide penala.

Prozeduraren edozein unetan instruktopeak iritziz gero lege-hauste penala izan daitezkeela aztertzen ari diren egintzak, ebazteko eskumena duen organoari jakinaraziko dio, eta hark, arrazoizko irizten badio, Fiskaltzari emango dio egintza horien berri, eta, aldi berean, eskatuko dio jakinarazten dion horren inguruan egiten dituen jardueri buruzko lekukotasuna emateko.

Era berean, jakinez gero administrazio-prozeduraren xede diren egitateen inguruan auzibide penala jarraitzen ari dela, Fiskaltzari eskatuko dio burututako jarduketan berri emateko. Komunikazio bera eskatuko dio administrazio-prozeduran aintzat hartutako egintzen emaitza edo

ondorio diren gertaerengatik bideratzen bada auzibide penala.

Fiskaltzaren komunikazioa jaso ondoren, prozedura zigortzailea ebazteko eskumena duen organoak erabakiko du prozedura hori etenda uztea epaileak ebazpen irmoa eman arte.

Administrazio-prozedura zigortzailea eteteak ez du galaraziko hartutako kautelazko neurriei eustea, baldin eta auzibide penalean erabakitakoekin bateragarriak badira. Auzibide penaleko kautelazko neurriak aski badira administrazio-prozedura zigortzailean aintzat hartutako kautelazko helburuak lortzeko, ez dira bateragarritzat joko.

Kautelazko neurriei eusteko nahiz halako neurriak hartzeko, egintzaren berri eman beharko zaio Fiskaltzari.

Nolanahi ere, epailearen ebazpen penal irmo bidez frogatutzat jotzen diren egintzak lotesleak izango dira administrazioko organoek bideratzen dituzten prozedura zigortzaileetarako.

Administrazioak ofizioz berraztertuko ditu ebazpen penalean frogatutzat jotakoekin kontraesanean dauden egintzetan oinarritutako administrazio-ebazpenak, ofiziozko berrikuspen-prozedurei buruzko arauak aintzat hartuta.

45. artikulua. AIEOari jakinaraztea.

Behar izanez gero, prozedura zigortzaileari amaiera ematen dion ebazpenaren kopia bat bidaliko dute zigortzeko eskumena duten organoek AIEOra.

Azken xedapena.

1. Alkateak gaitasuna izango du ordenantza honetan aldaketak sartzeko, baldin eta nahitaez aplikatu beharreko lege-aldaketen ondoriozkoak badira, eta eskakizunak aldatu beharra edo zenbatekoak edo ehunekoak automatikoki egokitu beharra badakarte. Aldaketetan beren-beregi adieraziko da hori. Aldaketa horien berri, berehala emango zaio Udalbatzari, berrets ditzan.

2. Ordenantza indarrean sartuko da argitaratzen den egunaren biharamunean.

Xedapen indargabetzailea.

Aipatutako egunetik aurrera, berariaz indargabetuta geratuko da, ondorio guztietarako, Txakurrak Eduki eta Zaintzeko 1998ko Udal Ordenantza.

Halaber, indargabetuta geratuko da Ordenantza honen aurkakoa den, aurkakoa adierazten duen edo honekin bateraezina den edozein udal-xedapen.

Erreterria, 2021eko urriaren 28a.—Alazne Korta Zulaika, Antolaketako ordezkaria. (7009)